

曝書亭集

七



曝書亭集卷第二十二

秀水 朱彝尊 錫鬯

古今詩 二十一

強圉大淵獻

宿陸上舍 聽雨樓

客鬢已星星小樓聽夜雨昨日海棠花飄落知幾許早有私  
蝦蟆聒聒草根語

天平山謁范文正公祠

范公祠屋此山中石筍抽萌萬笏同遺像依然窮塞主義田  
不改舊家風歸來散絹三千匹沒後題碑四五通近觀

天書銀榜在年年秋色照丹楓

康熙四十四年 御書濟時良相  
扁懸於南檐祠有老楓三十本

由上沙登靈巖山寺有感書壁

溪橋煙柳曉參覃瑩拂纜過三月三人自雨中來雨外路從  
山北轉山南遺民老結蓮花社開士高居燕子龕茶板粥魚  
消歇後空餘井谷上方甘

胥口

胥口如繩直吳船比屋高往來陵雨雪歌笑涉波濤淺碧搖  
新柳天紅露小桃近年浮宅慣未覺此身勞

讌集張上舍

士俊

水周林同諸君分韻得人字

岸上牽船思曼水中築室靈均客來何者是客客去此中有  
人

石湖

吳下長爲客舟行不計程過橋湖水闊隔岸野雲生寒食誰  
溫酒深村亦賣錫農人占甲子最喜上方晴

高麗漫歌賦謝納蘭院長

揆敘

若稽古帝伊耆穿九井御六螭百穀既播雨露滋蒸民乃粒  
無阻飢維帝念人壽之不永稽首再拜就泰壹小子而問之  
小子前致辭養生固有道曷不施赭鞭鞭百草嘗其平毒審  
其寒燠烏皓切別君臣異溼燥或冬而萌或夏而槁豐者芟蔓者  
抱鼎用飪臼用擣呶咀三百六十五味著爲本草經授諸醫  
師俾讎討山娟娟子樹濛濛爰有紫衣童子歌宵中瑤光之  
宿帝車尾散爲仙卉三椹五葉各一叢人銜鬼蓋海腴名不  
同是爲土地精肩股各具體有時黃口兒土中啼不已高高  
羊頭岡深深虎穴底立苗團紫雲結子墮紅米晉上黨趙邯  
鄲遠而新羅百濟根結蟠我昔於高麗圖經曾覽觀胥餘啓  
宇後朝鮮世世稱外藩森羅三千七百島四至八到提封寬

域中生蔓類羊角其上椹樹清陰攢春州產尤嘉堅白少垢  
癥聞諸遼陽土木搨地先以熱湯野爐煮何異都蔗去汁方  
登盤此邦之人日炙風戾乾元氣不損形神完珍藥豈易得  
恒愁致者難納蘭學士相於久憶別重逢歲在酉三面山臨  
一面江

學士游韜  
光句也

誦君清詩不去口今春

鳳艦復時巡扈從

依然八十一車後朝來帳殿喜合并憫我形枯貌鰲醜分我  
神草凡百莖投之几案鏗有聲五加一把安足道愛玩不異  
懷中瓊服之洗憂恚定心氣益神智還精髓失笑頗類西域  
之駱駝口不能嚼左右齏老眼秤星渾不辨刀圭約略付銜  
鑷作詩報學士奇觚急就有媿盧仝馬異劉叉何

過龔御史

翔麟

田居留飲即席賦

蘭臺有柱史敢諫名不虛奮舌彈將相收身還里閭性不愛

肥膩築室田中居田中何所有活水清不淤竹依上番種瓜  
撰辰日鉏十枝五枝花一寸二寸魚籬下舴艋舟門前鰕鯨  
車雖然在城市俗務已漸疎交謫無孺人著錄付小胥曉督  
芸鼓芸宵從漁父漁我來適孟夏乍見蓮葉舒蘆藩打槩入  
直前上階除是日新雨後泱泱鳴溝渠一孫扶藜杖

桂孫二

客停筍輿

查編修嗣琛  
家上舍思贊

主人略禮法小摘園中蔬山庖遠糲腥

俊味頗有餘日長語雜亂要勿及除書學稼既有懷老農豈  
不如清詩唐宋間流傳相歎譽幽棲洵可樂奇服遂厥初試  
觀襪襪子有若窮相驢團團日旋磨進退皆牽挈對此淡蕩  
人物外心相於躬耕許我耦願言期溺沮

初夏湖上同佟學士

法海

賈編修

國維

查編修慎行

嗣琛

汎舟學士紀之以詩遂和其韻

新晴最可娛天朗片雲孤  
蓴膩魚王塲鶯嬌柳浪湖  
水亭施步障風幔結流蘇  
今夜弄明月千金此一壺

瑪瑙寺陳閣老行館

寶勝湖邊剎峰連葛嶺青  
過橋行殿近散直小車停  
野飯移厨速山泉入筧聽  
只愁宣喚至容易別巖扃

武林逢鄭高州

梁

高涼太守鬢成絲青眼看人似舊時  
桐樹半生無改色蟹螯一手尚堅持  
後來領袖歸才子老去雲煙勝畫師  
別久重逢轉傾倒七言三復曉行詩

太守右體不仁左手猶能作畫其曉行詩云野水無橋牽馬渡曉星如月照人行賦景最

王公子性有才名

飲查編修

慎行

寓樓二首

顛毛初白與僧同

編修取蘇學士僧臥一菴初白頭之句自号初白菴主人

逐隊仍趨

乃朶殿東

恰喜行厨櫻筍熟，繫鞵且對一漁翁。

唐學士繫鞵坐玉堂

高館江湖左右開，三罇榼酒倒官醅。十年舊事篝燈話，此夜

方舟泊釣臺。

戊寅四月同編修入閩

杉青插別侏學士

法海

跣跣題紈扇，灣洄住綵舲。合并曾幾日，相送落帆亭。

曝書亭得孫學士

致彌

都下札

杖藜還藉短童扶，暇覓筠牀雀糞洿。典籍曝餘翻散亂，田園歸後轉荒蕪。病蔬幾見連筒灌，薄酒生憎入市沽。差喜故人遙記憶，八行書肯報潛夫。

苦旱茗飲乏水，戴秀才

鏌

以所蓄天泉見惠，率爾賦

詩

浮玉山矐兩目，荆溪橋斷百瀆。吾家長水口，夏至不沒狗村。



農鳴鈺踏水車有如赴壑之修蛇青天無雲赤日午相與結  
隊撈魚鰕忽焉長水涸水車無聲泥上閣東臯種禾禾漸焦  
南山種豆枯豆苗紫茄黃瓜半灰朽安得舊井寒泉澆朝來  
約童子越阡度陌汲湖水昨行五里今十里斯時老夫出亦  
愁入亦愁躁類楚沐猴喘似吳耕牛既不能喝三江五湖倏  
倒流又不能使龍跳蛟舞拔老湫升斗之水何從求戴生前  
一言家有泉兩壑須臾擔僕來打門遽相送樂莫樂且先嘗  
何減三危之露九醞漿竹火爐冰瓷盃鷹觜長雀舌短飲罷  
北牕眠月輪又新滿仰面問金波那不麗天畢雨滂沱何辜  
今之人忍令禿髮女妓市也來漣娑

生自柘湖還言  
半妓見乍浦

寄鄭秀才

元慶

鄭生五亭住四面白蘋香竹樹旱無恙湖田低不妨圖書宜

後定天氣欲新涼近得苔溪集

南渡劉一期詩文

君讀草堂

更舞蛟石爲蛇蟠石紀之以詩

并序

府治東徐少卿祠有苔石奇古土人目曰舞蛟傳是花石綱所遺然至元嘉禾志明柳琰鄒衡趙瀛三志均不載未析所從來按元慈谿黃玠弁山小隱吟錄有爲濮樂閒司令作蛇蟠石歌樂閒家濮院意明初產入官後好事者移置此地爾妄擬李白更九子山例書之禾錄

石以舞蛟名未若蛇蟠古試誦弁山吟圖經猶可補

吳甥

振武

用指頭作畫花竹翎毛草蟲山水畢肖異

而賦長歌

軒皇曾列素女圖虞帝欲觀古人像禹鑄神女姦貢牧金康模  
酌酒豐侯相周官設色之工五畫繪由來有專尚彼時蒙恬

筆未製安得中山管城樣不知渲染用何物藻火山龍授師  
匠指頭作畫舊譜希巧者未述知者勑吾家賢甥罷官久玉  
桂國中少倚仗林泉高致頗軼倫往往得錢埽屏幃入春放  
溜始歸來啜粟承歡北堂養田園松菊縱荒蕪且免折腰走  
俗狀蕭晨訪我梅會里小艇恰乘新水漲開顏並對竹垞竹  
一技尤精難比伉先施淡墨後濃墨食指兼需巨擘將有時  
爪痕抽藥苗有時指節成花當雪禽不數唐希雅風蝶何殊  
秦友諒少焉滌硯寫山水茅屋苔磯雅清曠斯須湧出八九  
峰瀑布飛流樹穿浪釘頭鼠尾信手皴程奕屠希見惆悵漆  
園以指喻非指天地一指巧相況覲爾新圖捫指成使我衰  
年一神王移家思避消夏灣歲旱湖田定無恙角里黎容客  
至嘗毛公壇許人扶上橙黃橘綠及是時十幅蒲帆趨所向

甥能從我賦近游共醉山家隔年釀

南垞晚步同王生

涪

荷風剛罷浴蘭畹已新涼高樹下歸鳥小牕明夕陽蛇牀秋  
草徧魚尾暮霞長老圃論生計纔收一稜薑

過李上舍村居

偕行十畝桑外並坐千年樹根猗玗子無惡客武夷君有曾

孫

元結自号猗玗子以不飲酒者  
爲惡客上舍六十已得曾孫

五毒篇效曹通政

寅

用其首句

南蟲毒頭北蟲尾以類名蝨總爲虫五者潛行疾如鬼誰與  
點筆繪作圖一一獐劣殊形模五月五日張戶樞嗚呼之蟲  
螫人遇所觸謀及乃心禍斯酷世間無如倮蟲毒

送筵占楊叟還廬江

桐帽梭鞵冰雪容山茨歸臥棗香濃瓊茅欲就靈氛卜知近  
浮槎第幾峰

雨集平山送查編修

嗣璵

蔡舍人

望

方上舍

世舉

唐

明府

紹祖

入都二十韻

金飈斂行潦絳葉鳴凜秋曉雨原上來枯桑落荒溝筠車北  
岡路徑盡知所投平山表遺迹經始歐九修手移新堂柳綆  
汲冽井流至今闌檻曲詩版存王劉吾來堂未建再至乃登  
樓未知百年內紺塔能復不一蕭陽二十子恒久載酒羅庶  
羞征鴻適來賓鳴鹿迭相求翩翩羣雅才簷笠偕燕游江光  
湧平楚草色連遙洲淮南十一郡千里極望收同人齊所願  
于野獲良謀查蔡金閨彥方唐才士尤將從畿南驛直抵山  
後州豈曰無裳衣客子在道周感彼蟋蟀唱役車何時休燕

南趙北際慎勿久滯留且復飲沉頓率意成狂謳

紀夢作

北山叟卜南山宅言歸北山人不識山家黑犬兩耳黃獨木  
橋邊吠行客柴門之下水淙淙枳籬以外花茸茸偶然鞭犬  
失青竹化作羊須一白龍

送程秀才

元愈  
還宣城

梅孝廉庚女婿也

花飛春水都官句山抹微雲女婿詩送子羊頭車一兩滿林  
柿葉正紅時

歲暮送張生

星  
還吳

四野同雲淄淄寒只應小住共春盤懷歸潘岳真多事遺挂  
重思面壁看

著雍困敦

五言賦鴨餛飩

禾俗養鴨兒樂府歌阿子一雄挾五雌累百喙長水方春穀  
將出生意不可止要術啄菹宜市月雛定起淺夫計欲速火  
攻迭運徙半體形已呈忽焉混沌死他邦盡棄擲吾黨獨見  
喜鄉人目曰喜彈劔童屑椒桂竈妾洗毛髓色淆黃白斑候斂漿汁滓  
鴨簽哂東京鴨劔屏南史旣免治刀砧兼弗齧牙齒以之号  
餛飩莫審所自始得非飲食人桐江方萬里記取秀州門竹  
杖扶入市萬里竹杖詩跳上岸來須記取秀州門外鴨餛飩至今七十坊至元嘉禾志載坊巷七十饌法傳  
伍氏物微愛憎殊留賓姑舍是二子下箸貪桐城方世舉嘉興李宗渭謂足  
勝羊豕作詩賞逸味虛谷同一揆不知天地間何者真好美  
試問廚煙生曾否動食指

送李上舍之濟南謁新城王尚書

海右惟濟南具饒山水趣側坎躑突泉單椒華不注匯爲蓮  
子湖七橋從坦步尚書宅新城道重東山傳絲竹匪所耽騷  
雅乃先務林端有嘯臺池北但書庫著錄幾千人片言等墳  
素李生辭菰蘆高山動遐慕譬諸驥騄姿孫陽宜一顧莫因  
籤程迂直趨九河渡送行吟短章心飛蠶尾樹

蠶尾山房尚  
書著書室也

九日籬菊未放桂有餘花里中諸子過出金華酒小  
飲分韻得小字

叢桂落餘花雙餅出清醪我客不速來毋論戶大小冷笑登  
高人牽拂風林抄

潘檢討

未

以方竹杖見贈賦謝

天台方竹杖絕勝萬年藤九節仙人斲兼程衲子能免尋籃  
輦坐且喜石橋登準擬池南岸晨朝相菊塍



德藏寺咏古跡五首

雙塔

寺門雙塔並夕照  
桂林西影落東湖  
曲參差終不齊

梓徑

入寺一徑分文梓  
昔無數想見獨吟人  
赤脚踏紅雨

趙王孫孟堅有詩

浦花堂

百里魯公浦風荷  
岸岸香金沙誰布  
地傳是道宣房

松風臺

松樹已無榦松風  
舊有臺華亭初不遠  
定有鶴飛來

山月池

海山一片月終古  
照池水當年人定鐘  
聲聞十八里

事見魯應龍閒牕括

天游觀歌寄贈崇安王明府梓

昔我登武夷勝絕天游觀諸峰羅鳥下一亭表天半水紋斷  
續流石骨陰陽判藥鑪茗盃不外求谷鳥林猿迭相喚老夫  
高尋豁兩眸坐久嬾下崎嶇丘夕陽滿樹嵐翠浮白雲忽起  
山之幽須臾逢逢漲巖壑仰視昂車井鉞參旗收恍如置我  
不繫之虛舟蓬萊方丈海外州天雞乍唱旭日旦依舊列岫  
仍環周回思此地神物怪疑詎可測願為道士驂駕白鹿騎  
青牛年今八十行歎復坐愁安得九節竹杖扶我重上仙掌  
之峰頭閒吹鐵篴弄明月乾魚糲飯長勾留邵陽王子今為  
宰詩思潘江文陸海仙才自合治仙山一鶴一琴恒並載擢  
歌九曲和元音逸韻清鏘音欵乃書院琳宮次第新陳丹暗  
粉更番改畫簾暇日考圖經祠祿題名舊章在騷人初度先

春期玉梅早發珊瑚枝  
邑人躋堂齊介省頌侯  
戩穀無不宜  
三漿十酒斟滿卮  
亦有鼓板兼歌師  
當筵漫奏賓雲曲  
明府自有白雪陽春辭

查二編修弟

嗣琛

煎錫爲洗頭盆注水扶寸江行恒

自隨乃以脫贈賦五言詩紀事

查仲華山頂曾窺玉女牕  
洗頭無俗具注水愛深缸  
巧匠工煎錫騷人利涉江  
塵容許三沐贈我載歸艘

題盛叟生壙

宜山居士抱詩癖  
老傍南湖度幽宅  
莫嫌丙舍少兒孫  
且免他時賣松柏

題張平山水墨明妃出塞圖

畫師徧寫春風面  
殺粉研朱總未爛  
似此澹描翻絕世  
按圖

誰復詆平山

曝書亭集卷第二十二



曝書亭集卷第二十三

秀水 朱彝尊 錫鬯

古今詩 二十二

屠維赤奮若

寄查山張上舍二首

昔訪查山麓梅花香滿頭筠車三日坐日日醉層樓八載負  
前諾今年春可游老夫無那嬾風雨返孤舟  
傳說幽栖好經營與舊殊立碑先墓側注水小山岵路近通  
香海帆輕截太湖不知熨斗柄更插幾千株

送施生重游武卮三首

止止菴深舊下帷焙茶擣紙遠如期春山一路無啼鳥澗水  
聲中到武卮

度嶺虹橋架壑舟無妨仙侶暇重游修琴載酒途非遠誰道  
山中不可留

隱屏峰後石蒼黔百丈傳聞挂水簾好事畊漁曾不到圖經

藉爾後游添

吳人徐達左洪武中游武居繪九曲之勝不及水簾洞畊漁子達左自号也

雨

曉雨仍鳴瓦春陰未浴蠶乍看抽菜甲翻覺斂花蒼窮鳥窺  
檐入枯魚得米泔似離愁雁戶泥滑市西南

即事二首

并序

入春菽麥未熟饑民載塗告于太守諭諸比鄰各率私錢爲  
粥以食餓者日萬餘人俄而謗書滿紙無由自白乃有落瓜  
里民就食經月以農務告歸持瓣香踵門稱謝紀之以詩  
惻隱人心共何期物論殊螿蝗齊挾斧蕙苾乃成珠捷捷謀

宵雅申申詈左徒角張逢五六作事哂今吾

世事翻成覆人言偽亂真不圖落瓜里乃有翳桑人布穀迎新雨收蠶及暮春要知升斗水也足潤楨鱗

野老

學易村夫子勞勞方寸心卜錢求漢鑄新得火珠林

東友人

吾圖吾書筦鑰則無與子忘形點勘墨朱期我故人無失其故  
乾餼以愆將子無怒勿躬勿親聆我詆謀人或迂汝胡詛我爲  
子毋居居子毋究究雖有新知人惟求舊

爾雅注毛傳居居懷惡不相親比之貌孫炎曰究究窮極人之惡

三月十日

詔下

青宮再建喜而賦詩



震驚由地奮異命自天申復覩重光日毋煩四老人堂懸銀  
榜舊筭出紵衣新媿遠青雲路難揚蹈舞塵

四月八日效長慶體

今年孟夏行冬令夜尚南風曉北風露頂劇憐黃面佛披裘  
仍作鹿皮翁榆錢柳絮愁飄損且喜餘花婪尾紅

題曹通政寅思仲軒詩卷

蕪城鮑明遠古調李騫期眷念同懷子因題思仲詩春塘宜  
入夢柔木易生枝更放過牆竹濃陰使院垂

公弟居此植杜仲一本于庭故以名軒

為殷秀才譽慶題梅孝廉庚春兩幽居圖

飛梁苔滑滑平楚風修修如何仙源水不有桃花流

題程上舍鳴寒梅霽雪圖

自寫苔枝竹外雪晴半樹梅花此地不携小酌明朝風起如何

真州客舍對雨

夏日北風起，殷雷聞再三。  
黑雲奔萬馬，俄頃徧天南。  
驟雨散銀竹，垂龍回碧潭。  
何來雙白鳥，猶自舞毵毵。

魏諭德

學誠

調鶴圖

蔚州才子嗣清塵，藻鑒持衡識曲真。  
畫裏歸裝無長物，一雙舞鶴比長人。

項叟小像

花開一百五，日月明二十四。  
橋君家大好，山水偏愛蒲團寂寥。

五月晦曹通政

寅

招同李大理

煦

李都運

斯佳

納涼

天池水榭即席送大理還蘇州

天池南有樓，天池北有樓。  
納言北樓下，招我池上游。  
軒牕拓

四面地潔無癥疣解衣挂短桁舍坐臨清流綠楊萬千絲花  
鴨六七頭徐聞水車響少待魚罾收須臾二李至各各情綢  
繆小胥搖大扇四座風修修蘭肴屏肥膩苦露獲所求古來  
避暑飲豈必量觥籌東園久不雨老樹焦煙浮青蟲高下墮  
吐絲若綴旒斯時墨雲升或躍在淵蚪因之鳴埴鸛且免喘  
吳牛有滄雖不作氣已如涼秋大理起避席疊櫂還武丘主  
人不忍別小舫尾中洲峭帆十八幅破浪同飛鯨榜人有常  
程歧路難久留分手文山祠日暝回孤舟

守風瓜步示沈秀才

翼二首

連檣水沉鐵鹿四面風吹石尤東澤曾留綺語請看月上瓜  
洲  
朝霞欲雨不雨歸路愁水愁風長江廣輪尋尺此事何關釣

翁

丹陽道中

丹陽三里城兩漿一舟行雞犬家家靜菰蒲岸岸生過橋斜  
照斂出郭小車鳴不比瓜洲渡波潮信宿驚

載

化益作將軍百蟲各率職周官去蠅黽庶蠱攻必力苟或害  
田功惡其傷稼穡食苗心曰螟食苗葉曰虱食苗根曰蝨食  
苗節曰蠶秉畀炎火焚田祖首罰殛嗟載本末微坏戶易潛  
匿花兒匠太慵掃除失記憶主人五畝園曝書亭在北樹之  
桃李梅三面少紫棘履道坦且幽穿徑曲而仄薰風來自南  
綠陰淨如拭睨皖黃鳥音續翻翠禽翼藻景愛靜觀悠然意  
獨得不意螫者蘇鬪生累千百縹碧黃朱斑文采假綠飾依

倚族類繁黨附蝥螻蠹誦詩三百人其名或未識上樹少卻  
行緣裳無懼色一毛散空際中者立受厄小兒女至頑敢怒  
不敢即傳聞官蝦蟇噓氣出胸臆之蟲在林梢蠢動自顛踣  
又聞小花鷹飛掠來海國慣伺之蟲嘗不避弋人弋二者均  
莫致俾爾橫暴極桑柘以飢蠶村姑有定則賦芋自狙公朝  
暮稟部勒豈若是物貪葉葉乃盡蝕有若人禿鬣又如烏希  
革歧枝結焚絲遺矢類深墨大哉造化工生物固不測巨或  
肆饕餮小亦具凶德荀卿原性惡斯言信剛直歲序迭環周  
時運互通塞商飈一以涼流毒自然息

贈吳下張生

星

一道蓮涇直到門粥魚茶版共晨昏郎官石柱書無敵甘白  
先生里尚存五載匡廬曾結社全家曇壤近成村看君用筆

形交讓足比西京繆篆痕

樵李

佳果先秋熟來禽也不如瑤光珠斗散青簡素王書瘦地翻  
宜嫁柔條亦易舒最防黃霧塞務使綠陰疎暑暍漿偏潤風  
吹粉未除豐肌須小摘纖核乃中虛銷夏吾鄉好分甘佛寺  
初曾留西子拍當食轉憐渠

查編修弟

嗣琛

家上舍

思贊

書來許以七夕見過愆

期不至漫賦

星期逾七夕露坐判三更河漢夜無影梧桐秋有聲愁嫌樺  
燭短涼覺苧衣輕可是烏巾酒連船載不成

蟋蟀二首

暑退陰蟲健無端處處吟起看河射角坐久院橫參易入羈

人耳潛驚嬾婦心物微甘在野何用苦追尋  
已被村童拾寧容古礎藏呈能矜小勇作氣恃方剛寸草心  
挑戰千錢注看場冷盆宮樣巧制器自宣皇

送徐甥

焯

之豫章三首

涪翁詩派授諸甥中有師川調更清我亦南州矜宅相雁池

賦雪早知名

西江詩派山谷甥居其四

繡鴨灘頭水滿磯豫章西去一帆飛心傷慈母停鍼綫臨發  
誰縫九月衣

南浦停舟霧雨迷登臨兩度倦留題風流輸爾秋屏閣簾幙  
看山盡捲西

社日送燕和查編修

嗣琛

好去炎州燕高秋別翠樞舊巢非不戀社鼓最愁聽寄訊誰

書札翻飛幾驛亭自今諸怯薛恣放海東青

村夜

山昏月未明木落霜初降何處夜歸人一犬吠深巷

顧孝廉

嗣立

過訪村居即席懷汪

秦來

郭

元釘

二徵

士二首

鑑曲歸狂客高陽命酒徒披縣黃雀臚入手紫螯麕道遠資  
雙屐

孝廉將  
逾庾嶺

宵長判百觚新詩喜同調端可傲江河

歙郡汪文學江都郭秀才圭璋宜特達時命乃遭迴喪子憐  
東野留賓少上台合并愁未得與子且銜杯

曝書亭集卷第二十三





曝書亭集卷第二十四

秀水 朱彝尊 錫鬯

詞

江湖載酒集

上

霜天曉角

早秋放鶴洲池上作

青桐垂乳容易凝珠露一縷金風飄落添幾點豆花雨  
簾戶翦燈語草蟲飛不去坐愛水亭香氣是藕葉最多處

高陽臺

并序

吳江葉元禮少日過流虹橋有女子在樓上見而慕之竟至  
病死氣方絕適元禮復過其門女之母以女臨終之言告葉  
葉入哭女目始瞑友人爲作傳余記以詞

橋影流虹湖光映雪翠簾不卷春深一寸橫波斷腸人在樓

陰游絲不繫羊車住倩何人傳語青禽最難禁倚徧雕闌夢  
徧羅衾 重來已是朝雲散悵明珠佩冷紫玉煙沈前度桃  
花依然開滿江潯鍾情怕到相思路盼長隄草盡紅心動愁  
吟碧落黃泉兩處誰尋

柳梢青

和沈山子西湖後游之作

障羞羅扇花時猶記者邊曾見曲录闌干玲瓏牕戶也都尋  
徧 兩峰依舊青青但不比省梢平遠第一難忘重來崔護  
去年人面

原作

嘉興

沈

進

山子

十二重樓是誰珠箔雙掩銀鈎桃葉春潮楊花暮雨一段  
閒愁 飛來沙際輕鷗芳草外春風舊游團扇歌殘羅衣  
試罷人上蘭舟

清平樂 秋夜宿燈公山房

秋林風絳鍾乳霜初降應有愁猿來聽講吠犬寥寥深巷  
明星無數茅檐披衣轉覺寒添不是山中無酒何妨一醉陶  
潛

憶王孫

黃蘆紅蓼白蘋洲一水東西南北流舊日秋孃尚在不石橋  
頭柳外斜陽花外樓

又 夜泛鑑湖

天邊新月兩頭纖鏡裏晴山萬點尖小櫂烏篷不用簾夜厭  
厭漸覺微風衣上添

生查子

雙眉澹遠山一髻簪寒玉鉛粉幾曾施最好新妝束 江月

去茫茫不照春船宿空有酒如泉難聽琵琶曲

醉太平

題姜開先贈歌者李郎秦樓月詞

支郎眼黃何郎粉香尊前一曲迴腸愛秦樓月涼 公羊穀

梁

鄭清之送新薑詩公羊穀梁並出一人之手其姓則姜蓋四字反切皆姜字

鄱易括蒼詞人試數諸姜算

堯章檀場

梅山姜特立括蒼人

附原作秦樓月詞

會稽姜啓

天下李一般柯葉分仙李分仙李東西南祖故家苗裔

漢時有个延年李唐時有个龜年李龜年李崔九堂前岐

王宅裏

女冠子

鶯篁軟語小店槐陰無暑索寒漿一笑千金值雙蛾半額長  
愛他黃竹子織就女兒箱那得銀釭下卷衣裳

望湘人

愛蘭風兩岸梅月半牆浣紗溪上曾住步障教移燭花漸熄  
依約斜窺簾戶虎僕毫尖麋丸墨淡倩題詩句記恁時卓女  
含情比我相如詞賦 愁思孤帆朝暮奈雙魚消息未傳幽  
素到香徑重尋祇有碧桃千樹晚絲撲柳晴絲卷燕儘自飛  
來飛去渾不見人面重門虛憶畫中眉嫵

思越人

小門關深徑轉昔年曾醉秦樓笑撚畫裙青案底教擡纖手  
藏鈎 臨行指我相尋路鏡湖一曲西去繞遍湖塘烏柏樹  
知他門掩何處

探春令

萑苻夜火那年屋角伴人驚走對銀灣脈脈含情久不道是

相逢驟露華如雨凝高柳滴單衣涼透到歸來始悔輕分  
手已許我攜羅袖

桂殿秋

思往事渡江干青蛾低映越山看共眠一舸聽秋雨小簟輕  
衾各自寒

更漏子

吳江秋泛

檣頭船菱葉港十里冷楓門巷江八測柳千條赤闌第四橋  
煮鱸香聽鴨語莫恨舟師催去空翠淡夕陽孤飛帆度石  
湖

采桑子

梧宮咏古

何年越客千絲網網住西施看殺吳兒貯館娃宮得幾時  
離筵白紵歌纔罷拋了西施遠去黃池冷笑夫夫真箇癡

滿江紅 金山寺

巨石孤根作

去聲

弄出寒潮嗚咽映焦山遠樹蒜山晴雪水品

中冷誰載取鐘聲兩岸何曾歇試層層路轉妙高臺簾齊揭

哀笛響風鳴葉樓船靜沙沉鐵望揚州一片海雲明滅浪

裏江豚空自舞天邊塞鴈飛相接把題詩張祜問山僧猶能

說

又 吳大帝廟

玉座苔衣拜遺像紫髯如乍想當日周郎陸弟一時聲價乞

食肯從張子布舉杯但屬甘興霸看尋常談笑敵曹劉分區

夏 南北限長江跨樓櫓動降旗許歎六朝割據後來誰亞

原廟尚存龍虎地春秋未輟雞豚社剩山圍衰草女牆空寒

潮打



風蝶令 石城懷古

青蓋三杯酒黃旗一片帆空餘神識斷碑鏡借問橫江鐵鎖  
是誰監 花雨高臺冷臙脂辱并緘夕陽留與蔣山銜猶戀  
風香閣畔舊松杉

賣花聲 雨花臺

衰柳白門灣潮打城還小長干接大長干歌板酒旗零落盡  
剩有漁竿 秋草六朝寒花雨空壇更無人處一憑闌燕子  
斜陽來又去如此江山

喝火令

豆蔻熏香匝檳榔潤小脣丫蘭斜插暈妝新輸與金錢多少  
看取浣紗人 無意曾窺宋多愁易感甄畫樓蠶蠟射南鄰  
那不當牕那不卷簾頻那不收燈時候月底踏芳塵

菩薩蠻

東莞書所見

佛桑花謝蕉心重  
牆陰浪蹙沙文擁  
何處采珠還  
素馨添雨鬢  
生香藏肘後  
瑣細兼紅豆  
一唱摸魚聲  
都來月下聽

東坡引

纖羅輕似葛  
遙山橫似抹  
樽前祇見銀河闊  
何人花底活  
雲鬟愁蹙玉釵休  
拔更纖手檀槽撥  
月斜聽到歌聲滑  
六么花十八六么花十八

酷相思

阻風湖口

社鼓神鴉天外樹  
見渺沙江流去向晚  
來石尤君莫渡  
大姑也留人住  
小姑也留人住  
杜宇催歸朝復暮  
轉把歸期誤  
儘燈火孤篷愁  
幾許風急也  
聲聲雨風定也  
聲聲雨

好事近

效朱希真漁父詞

新月下瓜洲重露漸成涓滴船尾漁燈紅逗映蕭蕭蘆荻  
偶然鼓柁度金山夜久梵鐘寂一縷潮痕催送報隔江風笛

前題

李符

辟塞舊時灣留得楸頭船小數徧生涯安穩只浮家去好  
鴛鴦湖水儘寬閒容我翠綸釣蕩入菰蘆不見有何人尋到

洞仙歌

吳江曉發

澄湖淡月響漁榔無數一霎通波撥柔櫓過垂虹亭畔語鴨  
橋邊籬根綻點點牽牛花吐紅樓思此際謝女檀郎幾處  
殘燈在牕戶隨分且敲眠枕上吳歌聲未了夢輕重作去聲也  
儘勝鞭絲亂山中聽風鐸郎當馬頭衝霧

有有令

計甫草索贈吳僮時來

樽前須記記取小名兒時來方見你年便周三五看秀靨依

然媚是天生付與騷人苦吟不足添他憔悴  
南北相攜萬里且緩作五湖歸計鎮日牋裁藤角洗硯收龍尾鈔詩更會  
人意問伊故里可有個延年女弟

南樓令

春水到門長春蕪繞徑香好花枝未隔東牆來往花陰仙犬  
熟已無意吠劉郎 舊事費迴腸支機片石旁便金梭投也  
何妨暗悔當時真箇錯無一語但形相

明月引

小紅樓上有紅妝是蕭娘是韋娘聞說他家慣自畫眉長扇  
又遠遮簾又下暗塵起紫騮嘶向夕陽 夕陽夕陽斷人腸  
柳半塘花半牆數也數也數不盡塘上鴛鴦偏我相思人到  
獨眠牀若遣個人偷嫁我拚兩漿打春潮送故鄉

蝶戀花

碧浪湖寬天水接郭外晴嵐佛髻三雲疊纔見黃花開穩貼  
一般也有悠揚蝶何處飛來江上楫妹是桃根姊定名桃  
葉賦就閒情添口業砑羅却羨湘裙褶

玉樓春

舊游聽說臨邛路壚畔燒春誇卓女不同新寡更風流斷續  
巫山朝暮雨遙峰眉樣應如故只有琴心難寄與從前翻  
恨是相逢剛道勝常看又去

帶人嬌贈女郎細細

絕小脣朱無多眉翠算舞腰楚宮有幾犀心一綫柳條通體  
比燕燕蟲蟲也還纖媚易露簾前最宜懷裏借片石迷藏  
花底一分難減千絲得繫待社日歸來與伊相對用東方生細君語也

似孃兒

鏡約總難諧十年事雨絕雲乖  
苧蘿未嫁西施日蘭橈曾並  
畫樓曾共香徑曾偕  
明白逗春懷纖纖步引上重階  
小屏風對鴛鴦浴無言半晌  
替他整髻翻溜金釵

玉抱肚

橋頭官渡沙頭煙樹放歸船  
碧浪湖中短篷同聽疎雨恨參  
差朔鴈何苦又慘澹江天  
叫秋暮城隅漸近隱隱梵鼓臨當  
去重去聲分付  
少別經年相逢地單衫佇立  
知誰畫看嫵好  
春兒過了都無緒好夢兒作去聲  
成都無據限仙源百尺紅牆  
翠禽小小不度斷魂難訴  
從今憶舊事淒涼尚堪賦  
但只怕你朱顏在也非故水  
又遙山又阻便成都染就  
牋十樣也寫不盡相思苦

梅花引 蘇小小墓

小溪澄小橋橫小小墳前松柏聲  
碧雲停碧雲停凝想住時  
香車油壁輕溪流飛徧紅襟鳥  
橋頭生徧紅心草雨初晴  
雨初晴寒食落花青驄不忍行

沙塞子

白頭無賴到西泠  
浮小艇愛問南屏  
依舊是風荷十里浴鳥  
沙汀酒徒一半已凋零  
重過處酒幔猶青  
有多少酒壚舊  
事訴與誰聽

惜分釵

雲鬢膩眉峰細小脣秀靨天然媚  
比紅兒更風姿一捻何人得  
似腰支師師李波妹桃根姊  
橫波微露千金意玉交卮乍  
同持漏鼓無聲未是歸時遲遲

百字令

富春道中

柁樓侵曉望樟亭木末霧收川淨誰把錢塘犀弩射衝落驚濤千頃霸業孫郎高風嚴子畢竟論誰勝西臺寂寞更何人埽巖磴最愛躑躅花繁畫眉啼處高下穿紅影十載重來頭已白愁對清江如鏡沙際鷓鴣門前烏柏引我移家興眾師漁父結鄰儘許相並

秋霽

嚴子陵釣臺

七里灘光見擁樹歸雲石壁銜照漁火猶存羊裘未敝只合此中垂釣客星曾老算來無過煙波好況有个偕隱市門仙女定娟妙當此更想去國參軍白楊悲風應化朱鳥翠微深鷓鴣飛處半林茅屋掩秋草歷歷柁樓人影小水遠山遠君看滿眼江山幾人流涕把莓苔埽

子陵梅福女婿參軍謂謝朓羽西臺慟哭記有化為朱鳥兮將



安居  
之歌

祝英臺近

任城登李太白酒樓

女牆低官柳暮俯首眺齊魯冷綴苔錢斷碣眠方礎最憐酒  
釀花濃好春閒度更誰解金魚換取 啓塵戶遙見十里帆  
檣催人動津鼓翠杓多情容我醉方去待他明月高時臨風  
歌處也未許此翁千古

百字令

度居庸關

崇墉積翠望關門一線似懸檐溜瘦馬登登愁徑滑何況新  
霜時候画鼓無聲朱旗卷盡惟剩蕭蕭柳薄寒漸甚征袍明  
日添又 誰放十萬黃巾九泥不閉直入車箱口十二園陵  
風雨暗響徧哀鴻離獸舊事驚心長塗望眼寂寞閑亭埃當  
年鎖鑰董龍真是雞狗

又為曹使君題江南春思圖

平林縹緲望江南  
春色依依堪戀二水三山愁未了  
猶有參差宮殿十四樓  
空斜陽細柳繫馬誰家院  
傷心王謝舊來惟剩雙燕  
最憶一曲秦淮浮橋斷  
板卷飛花如霰目極寒雲  
千萬里吹起驚沙人面記取扁舟挂帆歸去料得長相見  
新愁幾許六朝芳草吟徧

菩薩蠻

登雲中清朔樓

夕陽一半樽前落  
月明又上闌干角  
邊馬盡歸心  
鄉思深不深  
小樓家萬里也有愁人倚  
望斷尺書傳雁飛  
秋滿天

柳梢青

應州客感

金鳳城偏沙攢細草  
柳擘晴絲九十春來連宵鴈  
底幾日花前  
禁他塞北風煙虛想像  
湖南扣舷夢裏頻歸愁邊易醉

不似當年

多麗

送王懷仁謫官西安經歷

滿長亭落葉西風殘日縮青絲勸斟別酒一杯知共何夕且  
踟躕路岐執手莫愁他急管橫笛五斗猶分雙鳧自在此行  
千里更須努力到廳事藥囊丹竈清晝甚閒適爭誇道參軍  
未老幕府長揖 有高捧金人露掌削成玉女峰色好清秋  
樂游原上遠勝沙南戰雲黑北斗秦城西京漢苑登樓王粲  
幾殊昔灞橋外也應尋徧風雪定相憶看來歲芳樹隴頭寄  
我消息

上行杯

朝雨渭城歌罷柳煙深杏花開乍細草無邊青滿野 又早  
夕陽西下南浦送君斟玉斝駐馬珍重意莫辭把

清平樂 馬邑道中

客何爲者日日風塵惹燕子春來秋又社萬事不如歸也  
家書字字行行秋深只道還鄉不信行人更遠黃沙白草茫  
茫

采桑子 雲州書感

去年一丈天山雪凍鵲枝頭暢好春游到得春來祇是愁  
炎風匹馬黃塵裏又盼清秋涼月南樓到得秋來總是愁

消息 度雁門關

千里重關憑誰踏徧雁銜蘆處亂水滹沱層霄冰雪鳥道連  
勾注畫角吹愁黃沙拂面猶有行人來去問長塗斜陽瘦馬  
又穿入離亭樹 援臂將軍鴉兒節度說盡英雄難據竊國  
真王論功醉尉世事都如許有限春衣無多山店酌酒徒成

虛語垂楊老東風不管雨絲煙絮

滿庭芳

李晉王墓下作

獨眼龍飛鴉兒軍至百戰真是英雄沙陀去後席卷定河東  
多少義兒子將千人敵一一論功爭誇道生來亞子信不媿  
而翁 前驅囊矢日三垂岡上置酒臨風歎綠衣天下回首  
成空冷落珠襦散盡殘碑斷不辨魚蟲西林外哀湍斜照法  
鼓影堂中

同作

曹溶

殿宿莓苔岡平鼻鼻虛寢遙控簾鈎義兒成隊左右列松  
楸誰放沙陀雁影盤仙李飛入并州收京闕赤心家世長  
拱紫宸樓 英雄誇亞子提刀百戰囊矢前騶漸司香遺  
廟薶玉荒丘事去棠梨漫落滹沱化淚點長流金鳧出伶

官天下麥飯一時休

花發沁園春

王湛求方伯招同憚舍萬姚注若周雪客諸子飲郝園

蠟屐山遙浮觴溪遠愛他三徑幽獨斜陽滿地苔色侵階入  
影一庭空綠名花杜曲開未了秋林書屋最好是竹裏行厨  
教添沙際碁局近識風流地主把葡萄深杯百罰金谷接  
離倒矣絳炬燒殘仰見月華如燭高城漏促還問取勝游須  
續休嘲我馬上乘船玉鞭歸也相逐

夏初臨

天龍寺是高歡避暑宮舊址

賀六渾來主三軍隊壺關王氣曾分人說當年離宮築向雲  
根燒煙一片氤氳想香姜古瓦猶存琵琶何處聽殘勅勒銷  
盡英魂霜鷹自去青雀空飛畫樓十二冰井無痕春風裊  
娜依然芳草羅裙驅馬斜陽到鳴鐘佛火黃昏伴殘僧千山

萬山涼月松門

晝夜樂

贈伎蠟兒

花鬚未受金鈴護，被游蜂銜將去。縱輸蜜勺濃甜也，儘不辛  
不苦，自是嫌他無味。誤翠濤開甕頭，香聚纔得近。儂唇把春  
情黏住。冰絃打就繁絲縷，愛泠泠風前語。同心燭下貪歡  
惜別淚，珠難數。研就紅牋私印少，撥蟲魚小名添注。積多少  
相思一丸書，寄與

三晉釀酒多以蠟封甕口  
秦漢銅章皆撥蠟鑄就

燕山亭

清明日王湛求方伯招同劉津遠趙秋水毛子霞  
孔子威飲金粟園杏花下

鐘鼓新晴立馬斜，陽滿樹。臙脂透深映短牆，曲護危闌更綴  
數行風柳。燕外游絲惹多少，粉香紅溜。依舊正一笑，花前去  
年時候。況值寒食佳辰，問挑菜何人鬪。雞曾否春衫試罷  
玉笛吹殘，須盡百壺清酒。剛得黃昏，又疎影月明如晝。搔首

想來歲故園渡口

太常引

題姜夫人淑齋詩卷

三真六草寫朝雲幾股玉釵分髣髴衛夫人問何似當年右  
軍 鬢金堂上青綾帳外小字訝初聞門掩謝池春定書遍  
雙鬟練裙

蘭陵王

過晉藩舊邸

馬蹄捷遙望參差雉堞斜陽外芳草斷垣朱邸猶存舊城闕  
平臺歌吹絕禁得黃鸝調舌妝樓畔煙柳數株時見柔條路  
人折 閒尋老翁說記帶指黃河圭翦桐葉霓旌千騎春山  
列任桂樹招隱鴈池斟酒回眸琴瑟看盡滅問誰是豪傑  
明月最悽切聽短笛飄零哀角嗚咽歲蕤不閉牕紗裂有藥  
鼎霜碓畫廊塵屨累思深鎖兔苑冷一片雪



河傳

送朱紮來入燕

南陌歸客紫駟驕水驛山椒路遙落花如雨煙外飄河橋折  
殘楊柳條別酒西堂官燭短紅玉盃醉也休辭滿漏聲催  
且徘徊一杯勸君更一杯

風蝶令

送霍二還曲梁

南浦山無數東城月乍懸離堂箏語燭花偏愁殺斜飛金雁  
十三絃漳水流殘雪叢臺散曉煙酒家疎雨杏花天繫馬  
紅樓深處阿誰邊

蝶戀花

重游晉祠題壁

十里浮嵐山近遠小雨初收最喜春沙軟又是天涯芳草徧  
年年汾水看歸鴈繫馬青松猶在眼勝地重來暗記韶華  
變依舊紛紛涼月滿照人獨上溪橋畔

釵頭鳳

逢呂二梅

紅亭右清溪口門前總是春楊柳當壚語遮人住玉鞭墮也  
酒錢拋與數數數橫波溜深杯又意中盟誓卿知否同心  
苒相思樹雙飛蝴蝶鎮長一處許許許

畫堂春

徐溝道上作

東城朝日亂啼鴉雨晴芳草天涯輕塵初碾一痕沙何處香  
車春水青羅帶緩春山碧玉簪斜春風依舊小桃花花外  
誰家

桃源憶故人

祁縣登樓作

高樓百尺誰家院靜鎖歲蕤春晚可惜鰕鬚簾卷只是無人  
盼登樓搔首斜陽滿風起落花如霰可惜鵝兒酒煖只是  
無人勸

太常引 寄呂二梅

美人曾寄翠琅玕無計報青鸞日暮碧雲寒却似隔千山萬  
山 幾回明月一聲玉笛消息隴頭難小鳳綰雙鬟又何處  
春風畫欄

步蟾宮

代州伎有小字白狗者晨往曲中訪之不值戲投

疎簾日影纔鋪地却早被金鈴喚起朝雲一片出巫山盼不  
到黃牛峽裏 仙源乍入重門閉任閒殺桃花春水劉郎去  
了阮郎歸算只有相如伴你

青門引

別晁靜憐

賦別江淹多情杜牧朝來遠送一杯千里廣武城邊鴈門關  
外行徧板橋沙市且與同今夕玉山頽羅裙重倚月斜箏柱  
淚消蠟照風鳴牕紙 盼取桑乾河水悵不斷柔情滌迴難

似巫峽雲歸章臺柳暗應記曾分瓜字縱有相思句怕飛來  
塞鴻迢遞自今贏得春游詩卷頻題黃四

靜憐  
行四

一斛珠

贈伎餅兒

肌香冰雪生成命薄愁重疊近人三五圓時月弱似春絲瑩  
比玉盤潔 溫柔休把紅綾涅翻來覆去轉心熱多少垂涎

恁時節風韻他年留待夜深說

束皙餅賦弱似春絲白如秋練又云  
行人垂涎於下風唐聞喜宴賜進士

紅綾餅各一枚吳筠餅說變瘦曉  
風淒淒夜冷臣當此景惟能說餅

蘇幕遮

別王千之

朔雲垂霜鴈過上苑秋深一帶寒煙鎖數盡歸期猶未果無  
事長安空把征衫浣 折黃花傾白墮又是驪歌送客旗亭  
左我淚別君君別我莫灑臨岐留作相思可

南樓令

情人寄靜憐札

瓦市塞雲涼封書遠寄將小樓前一樹垂楊縹緲試聽樓上  
曲催短拍玉娥郎 雙袖越羅香人同錦瑟長愛秋花慣插

釵梁行四曲中人定識只莫問謝三娘

謝三娘不識四字宋時謠也

醉春風

送陸集生孝廉還華亭

文采機雲後當代論耆舊橫汾千里自西來驟驟把袂中  
秋銜杯幾日送歸重九 素業清江口丙舍今存否尊鱸忽  
動故園情又又又瘦馬秋塵亂山落日板橋疎柳

最高樓

登慈仁寺毘盧閣

登珠閣落日在檐楹鐘鼓報新晴玉驄嘶罷飛塵起阜鷗沒  
處冷雲平且銷憂千里目異鄉情 望不盡軍都關一面流  
不盡桑乾河一綫南北路短長亭寒沙莫辨蘆花白秋霜未  
脆柳條青步踟躕松陰轉月華生

金明池

燕臺懷古和申隨叔翰林

西苑妝樓南城獵騎幾處笳吹蘆葉孤鳥外生煙夕照對千  
里萬里積雪更誰來擊筑高陽但滿眼花豹明駝相接剩野  
火樓桑秋塵石鼓陌上行人空說 戰鬪漁陽何曾歇笑古  
往今來浪傳豪傑綠頭鴨悲吟乍了白翎雀醉歌還闕數燕  
雲十六神州有多少園陵頽垣斷碣正石馬嘶殘金仙淚盡  
古水荒溝寒月

飛雪滿羣山

燕京歲暮作

椎髻鴻妻蓬頭霸子故園消息誰傳雪花如手同雲萬里幾  
回搔首茫然黑貂裘敝矣況兼東郭先生履穿一點孤燭兩  
行鄉淚惟有影相憐 豈不念飛帆歸浙水歎舊游零落無  
異天邊竹林長笛鴿原宿草又誰勸酒壚前薄游成久客惹

霜鬢愁添去年更無人問長安市上空醉眠

滿江紅 贈吳佩遠

蕪沒田園都不戀五湖鰕菜長只是簫吹市上劔歌天外千  
里曾經龍戰地頻年偶住雞鳴埭正昭王臺畔酒人稀逢君  
在窮巷隔無車蓋當暑靜弛巾帶向招提偶坐儘還瀟灑  
作賦最須憐趙壹時吳江趙山子在坐鼓刀應許同朱亥問  
白頭如雪幾時歸銜杯再

鳳凰臺上憶吹簫 和梁尚書傷逝作

寶鏡塵昏綵雲天遠燕飛不到釵頭悵花封錦誥書拆銀鈎  
多少吟牋筆陣鉛華謝一夕都收傷心是啼蛄弔月長簾驚  
秋今休他生未卜問碧落茫茫何處堪留剩無情哀鴈偏  
度妝樓只有安仁能誅看遺挂那忍回眸持籌慣凝思五曹

難算新愁

鎮西

送陳六謙之官安邑

雪晴鳩鵲正酸風交射河橋外鴈壺重瀉  
沉吟者計郵籤此去娘子關西春光滿野  
琴堂到時元夜蘭燭炧玉鈞山翠繞畫簾  
靜也料哦松合多亭榭堪游冶笑丞哉何負  
紙尾交箝龍蛇恣寫須添墨池官舍

意難忘

金犢香車問禿襟小袖上苑誰家粉勻全  
露頸雲膩細飄花柳陰重石橋斜春水浸  
芹芽想薄寒曾傾醕酪臉暈潮霞高城容  
易天涯有氍毹氍帳自在藏他錦韉馱叱  
撥紅燭理琵琶須記取畫蟬紗展挂玉鴉  
又更教添一羣蕃馬細草平沙



八歸 丁未燕京除夕同表兄舟石家兄夏士守歲作

爐存炭獸香浮樽蟻天涯又記除日尋思四十明朝是轉覺  
客懷難遣歲去堪惜旅館亂山殘雪夜幸款語相逢茲夕試  
屈指二十年來幾度在鄉國 南粵東甌西晉而今漂泊漫  
索長安杯炙何甥謝舅周郎陸弟舊事淒涼空憶且呼童秉  
燭好把新詞共題壁笑諸兄興還不淺爛醉狂歌看余鬢翻  
白

紅娘子 正月十三日夜同毛子霞張登子集王湛求方伯齋中

桑落甘如蔗齊向樽中瀉北斗春迴西堂燭膩沉沉此夜喚  
薛家車子近前歌勝名倡賽姐 纔把鄉愁卸又早春愁惹  
遶陌香塵橫汾花月東風臺榭莫匆匆上馬且銜杯任鈿車

歸也 是日立春

臺城路 十四夜

層城已下葳蕤鎖華堂更浮春酌水浸銀屏花移火樹人在  
瑤天笙鶴微風繡幕看蛺蝶翻飛鳳凰飄落八尺輕容美人  
無數卷珠箔 銅盤翠煙籠霧有水藻掩映回闌紅藥明月  
難留春宵易曉只合人生行樂箏琶間作任笑舞燈前綠牕  
齊拓問夜何其拚醉歸似昨

春從天上來

元夕

好月初升見翠霧霏霏霜色稜稜博山香滿不夜珠澄連夕  
有酒如澗況星橋開鎖細翦就湘綺吳綾碧瓏玲有水荷卷  
葉馬乳垂藤 江鄉故人堪憶歎雁後花前幾度愁凝錦字  
應挑紫姑空卜歸夢万里難憑想年來憔悴拋雲髻綠髮鬪  
鬢曲闌凭向小牕深處一點篝燈

南歌子 贈伎張綺綺

酒釀金船勸衣香石葉熏猶恐未消魂喚伊歌一曲月中聞

時伎宋玉環  
吹笙和之

虞美人 寒食太原道中

去年寒食橫汾曲曉雨平蕪綠今年寒食尚橫汾又聽錫簫  
吹入杏花村 古今多少橫汾客飲馬臺駘澤并州雖好不  
如歸翰與一雙新燕舊巢飛

曝書亭集卷第二十四

曝書亭集卷第二十五

秀水 朱彝尊 錫鬯

詞二

江湖載酒集

中

木蘭花慢

上元

今年風月好正雪霽鳳城時把魚鑰都開鈿車溢巷火樹交  
枝參差鬧蛾歌後聽笛家齊和落梅詞翠幌低懸景歛紅樓  
不閉葳蕤 蛾睂簾卷再休垂衆裏被人窺乍含羞一晌眼  
波又擲鬢影相隨腰肢風前轉側却憑肩回睇似沉思料是  
金釵溜也不知兜上鞦兒

習馬索

送崔二再游黔中兼訊李斯年

玉驄嘶須把青絲習他住燕歌易酒莫辭今夕離亭聚浮雲

一望綠波千里滿目銷魂江淹賦計落花時節黃陵楚竹湘  
煙響柔櫓行旅羅施天末木瓜金筑且伴叅軍作蠻語亂  
水孤舟逢人少惟有冷爔昏雨南尋李白問訊何如爲報頻  
年相思苦道故人別來詩卷總是人間斷腸句

沁園春

送葉元禮之真州

游子何之逸邈雷塘二十四橋正梅花如雪煙籠寒水垂楊  
拂地雨漲春條江左文章竹西歌吹麗句爭傳勝六朝褰簾  
處報玉驄到也紅袖齊招當年瓜步停撓有桃葉桃根送  
晚潮悵荆雲隔浦難邀夢雨秦樓按曲曾聽吹簫舊事堪尋  
長牋得寄便欲從君訪翠翹沉吟久怕重來不見見又魂消

宣清

送米紫來之官建昌

別酒初醒曉月猶懸天街鼕鼕畫鼓滿汀洲柳暉白蘋灑船

牕孫楚零雨昌邑城邊宮亭湖畔南州樂土且攜將法曹詩

風流香令同賦

紫來以司  
李改補

記九疊芙蓉五峰瀑布當年曾望

處想廳事花陰疎簾乍卷向畫中看小米雲山無數載鳴琴  
臨流喚渡任優閒寄情毫素長安布衣判留滯經春盼仙鳧  
一雙飛度

### 賣花聲

背郭鵲山村客舍雲根落花時節正銷魂又是東風吹雨過  
燈火黃昏 獨自引清樽鄉思誰論聲聲滴滴夜深聞夢到  
江南煙水闊小艇柴門

### 菩薩蠻

夕陰秋遠樓邊笛笛邊樓遠秋陰夕磯斷綠楊垂垂楊綠斷  
磯 霧深疑細雨雨細疑深霧門掩乍黃昏昏黃乍掩門

青玉案

臨淄道上

清秋滿目臨淄水一半是牛山淚此地從來多古意王侯無  
數殘碑破冢禾黍西風裏 青州從事須沉醉稷下雄談且  
休矣回首吳關二千里分明記得先生彈鋏也說歸來是

轉應曲

安丘客舍對雨

秋雨秋雨一半回風吹去晚涼依舊庭隅此夜愁人睡無無  
睡無睡紅蠟也飄秋淚

柳梢青

馬上望瑯琊山

遵海南耶我行山路朝儻非耶遙望秦臺東觀出日即此山  
耶 崖光一綫雲耶青未了松耶柏耶獨鳥來時連峰斷處  
雙髻人耶

點絳脣

濟南九日兒子南還賦此

開徧黃花年年九日他鄉度  
闌風長雨那有登高處  
西北南東祇送歸人去  
呼兒語暫同綠醕  
誦我悲秋句

六么令

壽劉宣人編修用劉氏事

張南周北

繪

正金華歸沐

孝綽

青藜然徧

向

詩膽如天誰得

似又

五字長城堪羨

長卿

海內觥觥

翊

雒中雅雅

釋宏演

美升堂彥

楨

公非公是才華兄弟齊擅

敵敵

試擬天半朱

霞

詩

雲中白鶴

敵

未比文心遠

魏

自有寒山叢桂在

安

那問

仙源深淺

遠之

乘月登樓

現

閉關頌酒

伶

初度書皇覽

劬

州相倚依然舊日王粲

表

霜天曉角

晚次東阿

鞭影匆匆又銅城驛東過  
雨碧羅天淨纔八月響初鴻  
微風何寺鐘夕曛嵐翠重  
十里魚山斷處留一抹棗林紅



塞孤

高唐道中曉行作

五更風一翦蘆簾啓挂壁燈飄紅穗仰視昂車星瑣碎穿曲巷嘶輕騎松門掩木魚聲草火濕秋螢尾愛涓涓響橋下流水莫辨斷塔稜亂結啼鴉隊月影潛消衣袂幾處炊煙茅店起葭露白籬花翠日已上最高樓霞又散無邊綺未輸他斗帳人睡

瑤花慢

寄酬陸我謀表叔

由拳城北童穉情親記數陪羣屐兵戈轉眼三十霜一水蒹葭人隔沙隄盡改算往事都成陳迹剩白雞夢後荒墩朱雀橋邊斜日寸心忽憶離居荷千里題書似親顏色齊紈皎潔詩句好髣髴玉溪風格一彈三歎勝鼓却朱絃瑤瑟但相逢蒼雁蘋鱗報我春鷓秋蟀

采桑子

寄贈史雲臣

梅谿樂府真同調，把袂偏遲。曾寄相思，載酒江湖杜牧之。  
緇塵不到橫塘路，穩臥山茨。醉詠新詞，春雨梨花燕子時。

真珠簾

寄陸郡守兄孝山

離居消息沉雙鯉，料因是地闊天長，難寄見說。訟庭閒但道  
遙文史，小小谿亭移岸北。搖白羽，風蓮秋水，猶記聽子規落  
月夜闌同醉。嶺表十四年來，伴參軍蠻語，也應憔悴。不見  
壘書增老穎，川循吏且飲修仁。江上水莫便作匆匆歸計，差  
喜有西牕翦燭，故園兄弟。

謂次友  
融谷也

清平樂

送沈融谷再游南雄

京華嬾住，又向雄州去。匹馬遙尋桃葉渡，穩送輕帆柔櫓。  
朔雲南雪，冬春鴈書欲寄，無因共惜行人路。遠不知身是行

人

瑤臺聚八仙

題錢舍人望廡集句詩

苦憶丁香花發後，潞水歸計初諧。秋帆一葉放溜直，渡清淮。蟹舍尊鄉能幾日，又誰知樂事全乖。暗塵埋紬兒卷，慢燕也分釵。堪憐此日騎省寫哀思，不住總爲情差。人已驂鸞尚

教營真營齋，青天碧海夜夜算明月。何從更墮懷燈前淚滴。

秋風長簟暮雨空階。

皮日休詩五更看月是情差。元稹遺悲懷詩今日俸錢過十萬與君營真復營齋。

點絳脣

九日同翁少宰

顧寧人陸翼王登孫氏石臺賦呈退

花徑登臺舊時此地重陽。燕天涯相見最喜翁猶健。望極疎林瑟瑟金風翦，憑闌徧夕陽一片送盡南飛雁。

百字令

偶憶

橫街南巷記鈿車，小小翠簾徐揭綠酒分。曹人散後心事低。

徊潛說蓮子湖頭枇杷花下綰就同心結明珠未斛朔風千里催別同是淪落天涯青青柳色爭忍先攀折紅浪香溫圍夜王墮我懷中明月暮雨空歸秋河不動蚪箭丁丁咽十年一夢鬢絲今已如雪

訴衷情

記得鈎簾深夜起小庭中人不語豆葉響秋蟲月底粉光融  
弓弓鎖蓮雙瓣紅滿衣風

邁陂塘

題其年填詞圖

擅詞場飛揚跋扈前身可是青兕風煙一壑家陽羨最好竹  
山鄉里攜硯几坐罨畫溪陰裊裊珠藤翠人生快意但紫筍  
烹泉銀箏侑酒此外總閒事空中語想出空中姝麗圖來  
菱角雙髻樂章琴趣三千調作者古今能幾團扇底也直得

樽前記曲呼娘子旗亭藥市聽江北江南歌塵到處柳下井  
華水

角招 裂帛湖春游作

冷波濯城西路曉來燕子齊掠龍舟今寂寞臥柳斷橋總被  
藤縛山雲漠漠漸作去聲弄春陰如幄小雨濃煙披薄知他花  
外誰家尚依然亭閣 佳約好春過却輕寒正怯肯把紗牕  
拓海棠開又落碧草冥濛東風還作麴塵猶昨偏濕了秋千  
紅索料是羞登牆角試吹動賣餠簫簫應窺著

十拍子

上巳逢錢葆勳舍人賦

曉陌重逢嘶騎秋帆記送歸船纔到燕臺寒食下恰值蘭亭  
楔飲年和風淡汀天 燕羽齊侵小院柳絲乍擘晴絲試傍  
玉河堤畔去定有紅裙水上湔須攜酒十千

玉樓春

伎席

蟲蟲本愛穿花徑改席迴廊翻道冷歌時小扇拍猶嫌醉裏  
香肩憑未肯情知並坐無由並且喜眉梢遠相映待他月  
上燭斜時壓住影兒應不省

鵲橋仙

席上贈伎張伴月

吳歌白紵吳衫白紵只愛吳中梳裏十年四度到京華纔一  
霎樽前同坐秋娘聲價秦娘聲價風韻當年須過迢迢明  
月碧羅天誰伴取張星一箇

又

橫汾清濟十年舊事祇恨玉鞭歸暮碧桃先自笑春風全不  
待社公新雨章臺穉柳漢南移種憐取柔條最苦游絲無  
力強天斜萬一把飛花黏住

步蟾宮 席上同沈六贈伎

越羅垂地湘裙匝淺露著鞵幫紅狹尋常已是不分明況一點紗籠殘蠟玲瓏骰子拋時霎遙勸酒觥船纔罷月高先自下階行又何處爲雲巫峽

前題

平湖沈岸登 覃九

雪花未淨侵階滑奈小小鴉頭羅韞惱人三五月朦朧數不定風鬟十八歌闌纔把觥籌撒聽去也一聲愁煞樽前相對且無言又那得相思書札

河傳

題譚天水小像即送其入閩

嶺外傾蓋日招尋一別愁深至今木棉花底榕樹陰獨吟江潭憔悴心忽漫相逢燕市酒嗟未久萬里仍分手度吳關到閩山艱難知他別後顏

南鄉子

拜客庭陰眼波容易逗人心縱得相逢無一語臨去鬢滑落  
花黏不住

一翦梅

題汪季角舍人錦瑟詞

錦瑟新詞鳳閣成贏得才名不減詩名風流異代許誰并是  
柳耆卿是史邦卿閒悶閒愁讀罷生吾亦多情那得無情  
問何人解按銀箏說與君聽先與吾聽

水調歌頭

得曹秋岳侍郎札却寄

朝鴈度紅峴秋樹冷金臺故人憐我久滯隔歲一書來楓橘  
山亭應滿薑蔗湖田無恙別業古城隈范蠡祠東月恰照小  
門開八行發三過讀轉徘徊栖栖南北何事瘦馬倦黃埃  
行處藤鞵竹傘坐處尊羹葛麪儘可共銜杯只此辦歸計歲



暮草堂回

又送諸駿男赴楚撫幕

雲幕近開府鄂渚舊名邦  
游人此去萬里風動碧油幢  
上馬能橫大槊下馬能書露布  
筆陣鼎應扛記室古來有意氣  
爾無雙  
瀟瀟雨聽木葉泝空江  
平沙歷歷斷鴈楚火照船牕  
赤壁山前故壘鸚鵡洲邊秋色  
千古怒濤撞不淺南樓興誰  
共倒深缸

又送鈿玉樵宰項城

吾最愛姜史君亦厭辛  
劉經過燕市多暇歌酒互相酬  
自向金門索米君亦牽絲作吏  
臨別始添愁檀板按新曲此事  
尚能不  
雷封好項子國古陳留  
江南風景宛似煙月北揚州  
也有疎簾清簟也許樽前家宴  
隨意發清謳三十六鰓鯉莫

忘寄輕郵

百字令

自題畫像

菰蘆深處歎斯人，枯槁豈非窮士。賸有虛名，身後策小技，文章而已。四十無聞，一丘欲臥，漂泊今如此。田園何在，白頭亂髮垂耳。空自南走羊城，西窮雁塞，更東浮溜水。一刺懷中磨滅盡，回首風塵燕市。草屨撈鰕，短衣射虎，足了平生事。滔滔天下，不知知己誰是。

又

和韻送曹子顧學士還南溪

十年相別，又相逢，攜手旗亭同入。試話長安歌酒伴，客久鄉音翻澀。正好歸帆，溪南如畫，紅葉新霜濕。衡門深閉，三冬且學龍執。猶剩百八株桑，一千頭橘，酒債還堪給。萬里山川歸腹笥，不用巾箱收拾。三影新詞，八叉麗句，箏鴈參差立。衍

波題就白藤閒織書笈

同作

平湖沈岸登

征帆江北又江南一曲黃灣深入鴈齒紅橋深柳巷聽唱  
新詞猶澀瓜步寒潮蒜山晚渡幾點霜鷗溼重陽過了拂  
雲石燕初蟄 試問姹女鑪頭酒錢細數誰把金魚給別  
後南溪溪畔路賦罷蠻牋爭拾老圃觀梅輕舟載鶴勝向  
花甌立十洲五岳畫圖看滿瓊笈

風中柳

戲題竹垞壁

有竹千竿寧使食時無肉也不須更移珍木北垞也竹南垞  
也竹護吾廬幾叢寒玉 晚來月上對影描他橫幅賦新詞  
竹山竹屋耶筒一束筍鞵三伏竹夫人醉鄉同宿

竹山蔣捷詞  
名竹屋高觀

國詞  
名也

長相思

紅橋尋歌者沈西

石橋西板橋西遙指平山日未西舟來蓮葉西  
人東西水東西十里歌聲起竹西西施更在西

蝶戀花

揚州早春同沈覃九賦

十里雷塘歌吹遠柳巷人家蘸水鵝黃淺游子春衣都未換  
鈿車早已東城徧妝冷罷遮蟬雀扇最恨微風不放珠簾  
卷斜露翠蛾剛半面心飛玉燕釵頭顫

同作

沈岸登

是處梅花香近遠點點苔枝漏泄春光淺歎息年華看又  
換踏歌聲按揚州徧睡起雲屏山六扇羅帳無人一任  
東風卷細馬馱來嬌滿面凭闌小語聽猶顫

思佳客

杜牧秋霜染鬢多樽前無奈紫雲何春風澹澹三城夜暮雨  
瀟瀟一曲歌眉解語眼橫波更看柔弱舞雙鞦黃姑悔不  
憐須女枉自含情盼隔河

東風齊著力

延平道中

百雉城開雙龍津合鐵鎖浮梁千家斷續三面水雲鄉繫纜  
沙邊且住纖絺軟五月猶涼休催去冷風閣上置酒何妨  
巨石擁中央舟一葉過時險甚瞿塘竹雞啼罷飛雨暗叢篁  
處處水輪山碓炊煙動菰米偏香灘聲急斷磯青樹又挂殘  
陽

江城子

飲道山亭

城隅一徑躡層冥坐孤亭啓疎櫺螺女江昏風急鯉魚腥懊  
惱鷓鴣啼不住煙雨外荔支青蒼苔乍洗讀遺銘問山靈

幾人經喚取深杯石上挹湘醪最好紅山橋外月先爲我出  
遙汀

南鄉子

游鼓山題靈源洞壁相傳五代時有高僧喝  
水水移他處遂涸

披霧曉同游竹杖籃輿各自由翠磴紅亭三十里淹留行到  
松門路轉幽僧飯雨初收風未鐘聲樹杪樓多事山僧曾  
喝水橋頭只少飛泉一道流

點絳脣

歸次浦城寄酬高雲客

幾日銜杯回眸咫尺榕城阻齊紈垂露不寫離情苦南浦  
橋邊總是銷魂樹山無數澀灘柔櫓惆悵歸時路

尉遲杯

七夕懷靜憐

吳綾白偏愛縫雙袖鴉翎黑多應北里新妝怕墮尋常標格  
微風簾額看露葉中庭盡秋色記鱗鱗月底疎雲曾照勾闌

吹笛 一自細馬馱歸剩羅帕當時別淚偷拭最恨初鴻銜  
蘆塞上不遞愁人消息枉飛度河橋山驛想柳外高樓長如  
昔更何年並坐穿鍼六度淒涼今夕

西谿子

那日樽前同坐剛值上元燈火引杯深賭葉子拋骰子醉裏  
交呼小字舊事暗沉吟到而今

一翦梅

子夜琴心調乍翻放誕文君多病文園柔腸繫處酒杯濃骰  
子巡拋射覆更番 紅蠟連燒花燼繁斜對雙蛾暗蹴雙鴛  
不應草草放他歸去便如期來便空言

百字令

元夕和陳山農韻

落梅歌斷笑六街春靜者番燈夕猶有蟬紗蘭燭膩山水米

家真蹟樂府偷聲故人相見鳳紙題還濕深杯莫放迴腸更  
話疇昔 年少金鴈箏邊銅駝巷口酒力輕寒敵醉倚紅妝  
呼小字忘了天涯爲客折柳章臺沉珠漢曲嬾問閒消息三  
分明月二分偏照頭白

擊梧桐

送曾道扶歸里

風雪寒如許偏灑就宣武門西歸路況是殘年也問何事幾  
日留君不住離歌斷續離亭長短目送離人此去瘦馬河橋  
外想除夕守歲題詩何處 江上梅花津頭柳色一葉扁舟  
淮浦絕勝陶彭澤腰未折早返柴桑衡宇惆悵孤蹤留滯竹  
垞歸夢有小園獨樹待明年南湖秋月與子同賦

秦樓月

風蕭蕭夕陽古岸盧溝橋盧溝橋沙迴小市柳折長條 誰



家紅袖揚輕綃暮塵十里車遙遙車遙遙銀燈翠被何處今宵

百字令

酬陳緯雲

過江人物數君家伯氏辭華無敵比歲才名驚小謝聽說尤  
工詩律二陸三張雙丁兩到聲動長安陌新詞贈我居然黃  
九秦七可歎岐路西東浮雲零雨別思同蕭瑟此日高陽  
逢舊侶一半酒人非昔碣石離鴻香山落葉風雪重游歷池  
塘夢裏試尋髯也消息

輓繡毬

歲除同兒子對雪懷鄉里作

寒雀斂層檐正萬里同雲催暮去年曾記梅花溪上童孫喧  
笑紛紛團就玉獅鹽虎回首亂山如許對孤燭異鄉同住  
遙憐千里老妻無恙竹垞門掩多應壓徧小園高樹

解佩令 自題詞集

十年磨劒五陵結客把平生涕淚都飄盡老去填詞一半是  
空中傳恨幾曾圍燕釵蟬鬢不師秦七不師黃九倚新聲  
玉田差近落拓江湖且分付歌筵紅粉料封侯白頭無分

摸魚子

送魏禹平還魏塘

一身藏萬人海裏姓名慵注官簿秋深門巷堪羅雀只共酒  
徒爲伍君又去認百疊寒山似綫鄉關路冰霜最苦盼到得  
江南平波斷岸猶及冷楓舞竹林伴依舊攀嵇交呂笛家  
琴調簫譜燕臺縱有尋春約忍負鏡邊羞嫵君且住算我便  
歸遲定不過闌暑高荷大芋待縛个茅亭能來夜話同聽紙  
牕雨

金縷曲

寄譚七郡丞兄在榆林

一別三重九歎年來燕臺寂寞酒人非舊遙望秦川邊沙遠  
客淚徒盈襟袖想塞下秋來風候白草黃榆天無際問圖書  
何處消閒畫泉一勺秫千畝 同心最苦離居久藉雲鴻題  
書萬里往來亭埃悔不短衣從兄去獵馬千羣關口便作使  
秦娥行酒酒後狂呼雙耳熱更彎弧射碎轅門柳窮塞主可  
能否

同賦

沈岸登

朔鴈驚飛起憶前年酒壚擊筑和歌燕市一自盧溝橋頭  
別滿眼斜陽流水悵去路雲山無際強欲尋君惟有夢奈  
夢魂不度三千里君憶我定相似 虛慚蹤跡天涯寄但  
逢迎五陵裘馬有誰知己翻羨一官乘邊障苦愛賓朋文  
史況蘆酒郢筒堪醉燕頷書生還未老拚從軍共作封侯

計帶圍減且休矣

又寄李武曾在貴竹

誰共金臺醉記年時酒徒跋扈盡呼朱李上已浮杯怱怱別  
雲散風流天際報一一平安書寄鄴下雙丁齊入座有多才  
繡虎稱前輩交唱和令公喜離羣最易添憔悴況而今相  
如賦賤鷓鴣都敝老去沉吟無長策仰屋著書而已但疑義  
須尋吾子秋錦堂前凋錦樹問灌園何日歸長水倚閭望幾  
年矣

又答朱十

李良年

尚憶青門醉正鞦韆翠裙入望帝城桃李君向揚州吾湘  
漢身與沙鷗無際感此日瓊枝先寄別後眠餐應似昔奈  
浮雲聚散傷同輩緘未拆雜悲喜頻年淚滴芳蘭悴況

天涯歲華易改錦韉俱敝退谷僧坊留題處舊事淒涼何  
已若天意定憐才子潘耒查容無恙在伴竹垞老去同煙  
水楚江柳又青矣

又同周鄭山陳眉倩飲嚴太僕齋中醉賦

滿目悲秋賦悵征塗衣裘盡典酒錢難數賴有城西嚴太僕  
肯與荆高爲伍拚痛飲忘形爾汝客罷長齋如泥慣更孟公  
投轄多豪舉觴百罰氣如虎天涯幾得良宵聚憶連年東  
西吳越後先齊魯主便不留賓也宿何況留賓不去任醉尉  
頻訶歸路我困欲眠公莫笑聽街頭遮莫鼙鼓還坐起爲  
公舞

又送陳參議祺公之官廣西

鴈塞分襟驟七年來關河迢遞合并難偶草草殘春相逢乍

通潞亭邊攜手恨不見李生良久天生也待踐深秋雞黍約奈

忽忽畫鷁津門口萬里別一杯酒丹砂此去鄰勾漏沂蠻

江人家兩岸綠榕紅豆才子從軍繇來事況是黃金懸肘擁  
千騎弓刀前後聽取連營長短笛譜武溪一曲南征又嶺外  
嶺柳州柳

百字令

索曹次岳畫竹坵圖

杜陵老矣共丹青曹霸白頭漂泊花柳春殘都未見底事燕  
南棲託略約長堤嘔啞柔櫓只憶江榔樂吾廬何處斜陽芳  
草村落況有蔗芋閒田竹梧舊徑客至堪杯酌試畫三楹  
茅屋矮隨意圖書簾幙峽石東西橫山近遠密樹遮雲壑明  
年歸去小樓添向牆角

渡江雲

送蔣京少入楚省觀

鼓鼓街鼓歇驚沙紛卷白日淡幽州望疎林郭外翦翦酸風  
聲栗響籬頭三杯兩琺旗亭酒怎把人留看一霎鞭絲茸帽  
驅馬度盧溝 離愁萬重煙樹千疊雲山縱相思夢有尋不  
到清江古渡黃鶴空樓趨庭正值椒花讌醉春盤儘許風流  
能記憶買田陽羨人不

應天長

鄭雲直招飲虎丘酒肆

三山曉徑七塔夜燈曾同閩嶠游屐零雨斷蓬別後迢迢夢  
魂隔西丘寺一片石愛綠樹濃陰敲側風林杪未斂斜陽猶  
照蟬翼 六載一相逢杯酒纔持那知是離席不見赤闌橋  
下催人有蘭鷁荆高侶燕市北肯忘了江鄉秋色紅蓮飯玉  
破鱸魚須待歸客

點絳脣

小院疎簾酒邊最憶年時事箇人纖麗合喚輕輕字

隋葉

飄花再見渾無計蘭燈翳那回微醉悔不香肩倚

向子諱有席上贈輕輕詞

### 河滿子

羊侃姬名靜婉謝娘婢喚芳姿最憶紅牕來去慣塗妝縮髻  
多時簾底頻搖扇子掌中曾拓鞦兒 萬里猶傳消息三年  
偶誤歸期碧玉無端偷嫁了空餘方寸相思輸與廬江小吏  
黃蜂粉蝶雄雌

### 天仙子

鴉翅雙盤垂秀領翠羅衣薄風難定全身都被月華窺天上  
影波底映却似曉妝前後鏡

### 十六字令

繁一樹丁香花壓闌心憐惜不向鬢邊看



祝英臺近

題汪舍人少壯三好圖

楮先生劉白墮此外也無个減字偷聲雙調儘教和囑他小  
小蟲蟲輕輕燕燕都不許兩眉春鎖 且深坐假若閒却芳  
年行樂甚時可暗悔從前所好未曾果料難老眼鈔書迴腸  
度曲但餘醞不妨留我

臨江仙

和成容若見寄秋夜詞

倦柳愁荷陂十里一絲鴈絡晴空酸雞漸逼小亭中魚雲難  
掩月豆葉易吟風 才子年來相憶數經秋離思安窮新詞  
題就蜀牋紅雪兒催未付先寄玉河東

又

寄酬李十九

問訊謫仙今好在年來酒債都消園花閒付僊童澆題詩過  
水寺種秫隔溪橋 白髮自憐歸未得生涯老漸蕭條尺書

虛負故人招秋風茅屋破梧葉幾回飄

又

藥甲齊開更斂柳絲欲起還沉一春閒望費愁吟酒旗風著  
力花事雨驚心 巷窄猗兒不吠樓高燕子難尋熏爐小篆  
疊重衾綠陰猶未滿庭院已深深

又 人日訪汪茗文戶部往堯峰山莊不值

苦憶茗華書屋別來幾度相招衝泥江郭不辭遙堯峰春最  
好人日酒先挑 想見青鞵踏處梅花開徧煙條東風溪上  
雪初消落帆光福市吹笛虎山橋

西地錦

送錢爾載之河中

到此轉愁君去且踟躕岐路遙山一抹初鴻幾點又疎疎秋  
雨 鸛雀樓頭凝竚定懷人題句他鄉歲月故園燈火話兩

家兒女

更漏子

送陳山農入閩

鹿谿南閩嶠路記我舊曾游處灘黯淡石嶮岼兩邊都是山  
渡螺江尋小艇蒨芳宜登絕頂長慶寺足栖遲須留噉荔  
支

醉花間

送王古直還西湖

愁君去送君去君去西湖住小閣鏡中懸是月初生處  
羅裙芳草渡一一鳴柔櫓扶上七香車長定門前遇

浣溪沙

七澤三湘道路重纖腰來自楚王宮玉簪無力鬢雲鬆妙  
舞定過張靜婉小名未記陸龜蒙惱人臨別始相逢

暗香

初夏飲何侍御筵音古藤書屋

石闌一半讓酒人占取斜陽深院密葉層檐幾日輕風勝刀  
翦靜對芳陰百尺宛似泊南湖南岸只少却柔櫓嘔啞遙指  
點小橋畔相見意款款任一詠一觴少長交勸繁英落徧  
涼月紛紛夜零亂多少長安旅話算鄉里同游應罕催漏鼓  
浮鑿落醉還不管

洞仙歌

送陳康侯入楚

雪晴池館悵離筵難又輸與游人鬧煙九憶橫汾策馬通路  
拏舟都不似此度忽忽分手遙山何限隔行盡窮沙盼到  
青青武昌柳後夜苦懷人一紙相思報碣石輕鴻能否算者  
舊襄陽未應稀知漢上題襟共誰樽酒

燕人目正月十九日爲  
煙九游人爭往白雲觀

減蘭

贈程叟

韓畱逝矣短布單衣逢弟子返照僧樓白髮蕭蕭話舊遊

琴箋細譜流水高山多樂府他日江關我亦填詞付汝彈

金縷曲

憶靜憐

塞土胭脂紫女牆深榆飄似莢柳多於薺身作紅襟雙語燕  
飛入碧牕紗裏看挂鏡親盤鴉髻象篋鰕鬚都不卷惹犀梳  
粉拂餘香膩勻面了掃眉未 玉娥遺曲康陵製換新聲箏  
調銀甲笙調銀字蝴蝶團團花底住分薄西風驚起夢不到  
綠陰青子白鴈橫天來又去盼蕭娘一紙書難寄五湖約十  
年事

曝書亭集卷第二十五

曝書亭集卷第二十六

秀水 朱彝尊 錫鬯

詞三

江湖載酒集

下

百字令

彭城經漢高祖廟作

歌風亭長剩三楹遺廟斷垣摧棟芒碭雲霾銷已盡惟見馬  
頭山擁逐鹿人亡斬蛇溝冷一片閒丘隴綵幡斜挂綠楊絲  
裏飄動 贏得割據羣雄六朝五季各自誇龍種魂魄千秋  
還此地人彘野雞誰共社古粉榆村遙巫覡孰管神迎送行  
人憑弔看來終勝劉仲

水龍吟

謁張子房祠

當年博浪金椎惜乎不中秦皇帝咸陽大索下邳亡命全身

非易縱漢當興使韓成在肯臣劉季算論功三傑封留萬戶  
都未是平生意 遺廟彭城舊里有蒼苔斷碑橫地千盤驛  
路滿山楓葉一灣河水滄海人歸圮橋石杳古牆空閉悵蕭  
蕭白髮經過掣涕向斜陽裏

江南好

江南好舊事試重論平底畫船桃葉渡小樓疎雨杏花村何  
處不消魂

同作

無錫嚴繩孫孫友

江南好最好石頭城細雨溼田磯燕小暖風扶上紙鳶輕  
遮莫近清明

金縷曲

初夏

誰在紗牕語是梁間雙燕多愁惜春歸去早有田田青荷葉

占斷板橋西路聽半部新添蛙鼓小白蕩紅都不見但悄悄  
門巷吹香絮綠陰重已如許 花源豈是重來誤尚依然倚  
杏雕闌笑桃朱戶隔院秋千看盡拆過了幾番疎雨知永日  
斂錢何處午夢初回人定倦料無心肯到閒庭宇空搔首獨  
延佇

邁陂塘

答沈融谷即送其游皖口

記分襟秋河射角相逢今已春序草芽香徑看猶淺早有落  
梅無數桃葉渡指鴈齒橋西舊是中山墅留君且住喚紅友  
傳杯青援翦燭伴我夜深語 勞生事白髮蕭閒未許軟塵  
翻又催去鍾山照眼青青在雲壑笑人何苦攜手步那得共  
春潮皖口揚舲度沉吟歸路算二頃湖田一絲釣艇肯負綠  
蓑雨



又用前韻題查韜荒詞集

對層檐沉沉春酌驚心屢換時序浮萍蹤跡如相避飛夢天涯難數芳草渡尋不到斷橋曲港龍山野白門此住望塔火林梢江樓鴈底莫共小牕語新詞好沈鮑同時矜許朗吟且漫攜去別裁懊惱迴腸曲轉覺良工心苦邀笛步試喚取雙鬟綽板樽前度迢迢紫路計秋水鱸香歸期未晚同聽豆花雨

又題顧茂倫雪灘濯足圖圖爲松陵女子沈關關所繪

更無須調鉛吮粉神針繡出天巧江村自是科頭慣不用雨中風帽木葉少向獨樹疎陰添个漁童小三高絕倒笑淺菊莎邊閒鷗磯畔千載有同調蓬門在深徑客來頻埽東籬頗厭枯槁香山詩卷牛腰重六十平頭未老貧也好那似我

黃塵六月長安道秋風舉櫂問斜日鱸香卜鄰定許歸計已  
先料

又

自桃葉渡泛舟暮抵浦口兩宿村店漫賦

憶歸時白門楊柳吹花糝滿香徑重來化作青萍子宛似客  
游無定呼小艇擬有分桃根桃葉行相並雲廊藻井枉費却  
臨流紅闌千百不見玉人凭 西郊路十里柔波如鏡石城  
高下殘景江豚多事頻吹浪只怕落潮風猛斜又整信一葉  
舟輕幾幅蒲帆逞人家煙暝傍急雨長蘆昏鐘古岸漁火隔  
窗冷

蝶戀花

送惠硯溪歸吳

人柳初眠嘶別騎婪尾杯乾送客還吳市春水一灣雙塔寺  
中庭盡種相思子 俊侶銅駝游倦矣我亦扁舟早晚成歸

計試喚紅兒來樹底翻香小令樽前記

又 同繆天自再過柯翰周圍亭

壓水藤牆敲石塢猶記霜深短櫂經過處獨木小橋秋葉舞  
倦紅不埽門前路 勝侶重攜穿竹語添結茅亭心許沙鷗  
住日暝澄煙吹不去夜涼滴作高梧露

柳梢青

題戴上舍惟意所擬圖

一道清谿露花開到紅板橋西不借鞦韆輕無絃琴矮沒骨山  
低 石屏詩句堪題休閒了秋容滿堤坐裏吟邊三升畫榼  
兩個黃鸝

摸魚子

題李武曾灌園圖

護笆籬幾層茅屋爲園期占三畝蘆簾紙閣安排易更要藥  
壚茶白溪雨後須記取上番移竹春栽柳扁舟計就算夜韭

辰瓜白鹽赤米一飯儘餬口  
高堂健笑御潘輿永晝好花  
隨意簪首疏泉帖石閒行處種樹  
僉童都有悵別久對圖畫  
沉吟轉覺難分手客來尋  
否判踏葉門邊繫船渚尾喚我作  
去聲鄰叟

又題徐電發楓江漁父圖

怪煙波釣徒鄉里  
苦師如許青鬚浮家尚載閒書卷  
那得身名全隱看一瞬把文賦  
詩篇樂府都經進披圖  
暗晒怕白水撈鰕紅  
闌鬪鴨與爾便無分  
扁舟在蓑笠綸竿未損攪人  
此日方寸清江幾曲  
楓林下多少鱸魚  
荻筍歸夢準挂十幅  
蒲帆第四橋能認  
餅中宿醞算八測塘邊  
三高祠下讓我醉  
眠穩

同賦

宜興陳維崧其年

問何人生綃滑笏皺來寂歷如許孤蓬幾扇西風底滴盡  
五湖疎雨垂弱縷儘水蔓江蒨信意牽他住寄聲魴鱖總  
來固欣然去還可喜知我是鷗鷺行藏事不是如今纔  
悟浮名休再相誤人間多少金貂客輸却綠蓑漁父誰喚  
渡早萬木酣霜紅到消魂處林林楓樹又遙襯蘆花搖晴  
織暝鬧了半汀絮

又寄龔蘅圃

玉玲瓏閣前松石經過朱夏曾撫主人直待秋期近金粟滿  
庭香雨新樂府早和徧蕢洲笛譜篔簹房句謂青士分虎也竹垞小住  
笑我若歸時留君爛醉十日不教去西堂冷孔翠應凋錦  
羽鹿麕高下騰距紅泥亭子方池外深徑共誰延佇歲旣暮  
想皖口鱖魚又好霑犀箸粉雲風絮定吹到山樓叢梅凍雀

把醖舊吟處

又 贈吳天章

愛蓮洋無多行卷才華直恁明秀紛紛日下柴車至逸藻吳  
郎希有李十九慣把汝詩篇三載藏懷袖今秋邂逅便訪我  
城東涼波殘月曉度玉河柳 交期合不在時時握手傾心  
偶共杯酒六街聽倦蓼蓼鼓頗厭征衣塵垢殘雪後待驅馬  
盧溝轉入孤山口蒼厓若曰伴翠竹黃梅香林守歲清興爾  
能否

又 題王咸中石塢山房圖

最撩人東華塵土騎驢蹙躩還往酒徒幸有王郎在更喜鈍  
翁無恙傾宿釀話黛色堯峰燈下吳音兩清詩迭唱畫十里  
山容茅堂石塢隱隱露微帳 南歸好髣髴高居仙掌栖負

儘自蕭放解蘭焚芰非吾事只是海懷霞想春水漲趁三月  
桃花也擬浮輕舫拖條竹杖約燒筍林香焙茶風細來問五  
湖長

又

同青士重訪晉賢時書樓落成訂詞綜付雕刻有  
懷周士季青在吳興

小舟紆梧桐鄉裏重來花已三度主人一笑還開徑樹蕙滋  
蘭無數留客住訝二仲依然未改當年侶別裁樂府譜漁笛  
蕩洲從今不按舊日草堂句東園好百尺高樓容與綠牕  
多少雲霧騰觚飛爵須吾輩禮法由來無取相爾汝但只隔  
賢兄令弟添離緒來朝喚渡認酒幔春橋茶檣夜柵便訪五  
亭去

蘭陵王

送宋負外牧仲視權贛州

禁街六嘶騎河橋一簇而今去嶺北天南忍對離樽便催促

雙旌行太速薄暝應投涿鹿吟鞭倚苑雪剛殘且喜輕塵未  
吹麴登艫九江曲算港截彭郎山問匡俗層層翠浪峰迴  
複過十八灘水萬疊煙樹滿園蘭草無數竹照廳事都綠  
川陸舊游熟奈上下龍雲無計追逐故人已分歸茅屋念翦  
燭深夜後期難卜楓林落月定憶我夢斷續

浣溪沙

郊游聯句

出郭尋春春已闌宜興陳維崧其年東風吹面不成寒無錫秦松齡留仙  
青村幾曲到西山無錫嚴繩孫孫友並馬未須愁路遠慈谿姜宸英西溟

看花且莫放杯閒彝尊人生別易會常難長白成德容若

解連環

孫愷似使旋夜話用李十九韻

一燈涼雨話丸都遠岫隔江葱楚曾未滿三月王程訝天角  
使星錦鞵來去箏笛賓筵聽按徧黃裙樂部問香秔酒釀七



夕醉眠莞弱何處 郵籤定能記否但西東指點玉羊金虎  
看擗擋藤笈陳編拂蠹字蟬魚載歸闌暑多少詞人邀鏡面  
留題方絮待細論箕子流風漏聲報五

祝英臺近

送張見陽令江華

錦鞍韉潭柘寺小榼載浮蟻纜及春游詩罷各分袂者回聽  
雨荷邊團茵柳外奈一曲驪歌催起 幾千里試看裊裊雙  
鳧銅章綰仙吏九面衡山二十四灘水定知後夜相思寒亭  
煖谷吟不了晚紅餘翠

又

送葉道子之官臨清衛

繡纏髮珠勒馬金印且懸肘勝作書生牕燭對紅豆計程幾  
日郵籤玉鞭花外早繁杏香飄吟袖 訪弟友只在春草南  
池無煩夢魂又小榼三升太白酒樓酒相邀露冕投壺東方

千騎總一色春旗楊柳

又

送翁武原之官黃州郡丞

嶽蓮雲關樹雨衣潤卸孤館記得班荆通路短亭畔自來南  
浦多愁西風易別把新鴈一繩吹斷再相見却喜小郡黃  
州銅符許分綰盡說官閒蝴蝶繞書幔最憐白露橫江青山  
如畫須夜夜綠樽教滿

又

題丁雁水韜汝詞藁

史梅谿姜石帚澀體夢窓叟不事形摹秦七與黃九試論北  
宋南唐偷聲比調誰得似玉昆金友章江口慣自家宴樽  
前箏人記紅豆一束朋箋豈意入吾手只合闌藥香時筒荷  
卷處次第付笛牀歌袖

燕山亭

七月十五夜同次友武曾融谷覃九集謾園竹屋

新雨橫街竹屋晚涼曲徑憐初埽深淺素瓷雪藕調冰添撲  
半竿紅棗抹麗叢香問甚日吳船攜到秋早漾一片明河兔  
華圓了何用擷笛彈絲有骰子玲瓏玉舟催倒檐牙罨網  
燈蕊捎蛾坐久露濃風小除却樽前數詞客幾人同調諧笑  
渾不計過申犯卯

前題

平湖陸 萊 女友

垂了簾衣宛在米家書畫船牕坐楸局未停玉子聲聲聽  
得賣花車過樹杪涼生吹幾葉絮雲低墮燈火暈粉莉娟  
筠翠捎香妥 纔度天上秋期對月徑風筵又陳瓜果南  
槽紅友內樣青瓷今宵錦茵拚澗嘶騎頻催便醉也欲留  
無那歸可料寫入竹溪有我

前題

嘉興 李良年 武曾

燕月微黃纔到竹間淡著江南影箔卷半牕露點涼波書  
屋短於煙艇底問青旗笑臘釀秋廚猶賸紅凝鬪古色甌  
香汝哥官定還記舊雨梅邊又一葉飄梧者番清景吳  
根夢去蟹斲魚牀西風暗吹簞箸旅話今宵都忘了五湖  
歸興更靜便挑盡燭花也肯

百字令

燕市逢李分虎

竹垞春雨悵早梅未放扁舟先發別後聞君浮皖口渺渺波  
潮天末燕市經過相逢一笑逆旅征衫脫鄉園無恙忽忽燈  
影中說正好青兕多才銅駝結伴按金荃新闕跋扈飛揚  
須爲爾忘却星星華髮座有能詩高三十五勸飲杯中物酒  
闌起舞滿身都是明月

高適行三十  
五指巖園也

滿江紅

送陸雲士宰江陰

仙令行時正柿葉翻紅滿村易州酒菊英沉沉細注離樽恰  
值蠲租新 詔下先教鳧舄指南雲問橋東青竹馬騎來凡  
幾羣 君山翠堆縣門香灣白流樹根任垂簾清畫譜曲黃  
昏十里秋花春桂粒一痕春水上河豚判明年小舫練江頭  
吟對君

綺羅香

贈沈融谷納妾

十斛量珠千絲結網枉說傾城難致選得閒房略與柘西相  
似書乍報翠羽枝邊人已在玉梅檐底問攜來百福香奩銀  
鈎多少衛娘字 龍吟新曲傳徧想出鴛鴦浴處青銅無膩  
此日雙頭只有粉蓮堪擬但點漆一鏡春山漫商量五湖秋  
水也須勝半萼燈花夜寒偎繡被

融谷水龍吟詠白蓮有待浮萍  
開處青銅無膩伴鴛鴦浴之句

風入松

送沈平萬之新安

蕭疎煙柳玉河潭殘月猶含離人報道城東發趁新涼卯酒  
初酣代馬頻嘶別路吳縣須換征衫歙州風物舊曾諳此  
去停驂烏丸素紙留題好繞清溪紫筍黃柑心逐一繩飛雁  
秋深直到江南

臺城路

夏日同對巖蓀友西溟其年舟次見陽飲容  
若渌水亭

一灣裂帛湖流遠沙提恰環門徑岸劃青秧橋連阜莢慣得  
游驄相並林淵錦鏡愛壓水虛亭翠螺遙映幾日溫風藕花  
開徧鷺鷥頂不知何者是客醉眠無不可有底心性矜粉  
長牋翻香小曲比似江南風景看來也勝只少片天斜樹頭  
帆影分我魚磯淺莎吟到暝

又

遠后洗妝樓

層闌不厭波光冷明霞遠捎魚尾細草含茸圓荷倚蓋猶與

舞衫相似揉藍片水曾簇蝶前紅影蛾描翠錦石秋花當時  
穩貼阜羅髻 春城幾番士女縱嬉游元夕沙界煙寺黃面  
瞿曇白頭宮監也說千年遺事回心院子問殿脚香泥可留  
蕭字懷古深情焚椒尋蠹紙

前題

長白  
納蘭性德 容若

六宮佳麗誰曾見層臺尚臨芳渚露脚斜飛虹腰欲斷荷  
葉未收殘雨添妝何處試問取雕籠雪衣分付一鏡空濛  
鴛鴦拂破白蘋去 相傳內家結束有帕裝孤穩鞞縫  
古冷豔全消蒼苔玉匣翻出十省遺譜人間朝暮看臙粉  
亭西幾堆塵土只有花鈴館風深夜語

又

送葉井叔主事還南鄂

新霜未染香山葉黃花已開秋圃側帽風前囊黃酒畔不分

故人先去忽忽里語忍別了吳儂竟歸樊楚一色魚天車湖  
爭似鶴湖住 蒲萄滿江綠漲愛翻鴉落雪門對南浦訪舊  
襄陽題襟漢上芳草知誰同賦相思最苦夢鴈影飛邊月明  
多處楊柳青青武昌何限樹

又

張鑑遠酌春堂席上賦

重門不改當年徑依然小山橫疊盧橘濃陰黃梅疎影正好  
酌春時節筠車乍歇仗酒伴仍逢昔游能說點筆淋漓爪牛  
涎冷久磨滅 烏衣羣從少長況周郎陸弟裙屐齊列金巨  
羅深玉屏風煖一曲紫雲歌徹樊川癡絕只可惜而今鬢絲  
如雪暝色高城初筵無奈別

又

送畊客南還

花南老屋花無數茅堂在花深處薑蔗閒滕竹梧小徑吾亦



板橋西住天涯倦旅忍負了芳辰又過殘暑底事秋風罷官  
不去送人去江鄉舊時伴侶有山中猿鶴沙上鷗鷺黃雀  
披緜玉鱸堆雪誰並船牕同煮離居最苦判茸帽衝霜也尋  
歸路得及春游紫荷田醉舞

又

送張漢瞻還嘉定題所畫望雲圖

秋來已是驚蕭瑟驪歌又聽燕館墜葉飄花飛蓬斷梗長倚  
浮萍爲伴雲搖雨散問底事忽忽便書驢券試驗新圖應愁  
穿了望雲眼百川灌河時節輕帆消幾日放溜江岸賣履  
迎船牽罾喚渡一笑倚問人健寒齋薄飯須勝似銅街酒籌  
茶盃改歲相期洞庭游未晚

喜遷鶯

送丁雁水觀察虔州

紅亭且住話十川天末舊游江路柳外吟韉酒邊征鐸行到

冶城瓜步一點峭帆風順遙指落霞南浦倚高閣埽千年殘  
粉更題新句 津鼓又幾日三板輕船水驛無重數螺子山  
南晴雷灘石飛作滿衣涼雨露冕行春多暇肯訪薜蘿人否  
謂冰叔也莫惆悵盼月華金掌載同鸚序

一枝花

送沈融谷宰來賓

露脚飄籬柱翠濕牽牛花吐一繩新鴈底幾行樹天未郵籤  
數了還重數行徧衡湘路六槳衝煙烏蠻山在何處 蚤戶  
兼龍戶多向竹棚頭住琴堂吟不盡荔支雨晝便垂簾待夜  
月修簫譜瘴鄉休道苦須勝似泉明折腰彭澤晨暮

同作

嚴繩孫

綠鬢銅章吏藉甚東陽才子柘西傳樂府滿燕市合喚羅  
裙鴛管調銀字忽漫牽絲去亂水荒山迢迢六七千里

木榭濃陰底清簾疎簾廳事憑題翡翠硯白藤紙酒伴無人蠻盜誰同醉記取雙江外第一是梅邊莫忘小驛花使

又

海鹽

彭孫通

駿孫

小縣雷江口面面雞桐蛇柳微風香繡滿拂腰綬白象雙  
跌也画城門否官閣簾垂晝黑蝶癡肥應憐八咏人瘦  
莫怨分襟驟且盡離亭尊酒明霞拖淡墨鴈飛候料得天  
南嘹唳聲希有多少連雲岫算兩地相思仙鳧甚日來又

又

安丘

曹貞吉

升六

絕遠賓江路亂水輕舟頻渡瀟湘行欲盡瘴雲苦千樹桄  
榔月黑鷓啼處到日清秋好蚤戶鮫人滿城隅看笑舞  
椰子傾甘露照影紅蕉初吐推琴小柱笏訟庭暮龍目香  
中早暗送年華去吟情應不減問寫就蠻牋重寄昭玉臺

否

又

秀水

朱昆田

文齋

小雨沙頭店風埽濕雲齊斂殘星猶掛樹四三點已是離  
人怎得離愁減萬里關河險過亂石重灘尖峰漸露如劒  
蠻女銅釵燄比似西看南臉山童爭喝馬翠旗颭幾笏  
書齋定有新詞豔荔子輕紅染更椰白蕉黃漫憶柘湖菱  
笑

邁陂塘

送尤展成還吳

話當年法曹姓字雲屏御墨曾染遂初堂下柴車促老矣攜  
文三殿燒尾宴喜四載柯亭鎮日長相見緇塵偶倦暫摒擋  
書籤丁寧才子紅藥守吟院扁舟好輸與風流賀監紅亭  
十里交餞蛤蜊菰葉橫塘路葉葉酒旗吹徧帆一點趁落木

空江澹抹山平遠八門七堰喚記曲桃根炙笙菱角憐取舊  
題扇

文三

又劉學正禹峰搨石鼓文見貽賦此志謝用姜白石體

問陳倉舊時獵碣橐駝燕市誰輦漏痕已失填金字猶剩雨  
苔冰蘚松陰轉訝鎮日橋門靜鎖人未見劉郎放卷慣著手  
摩挲巡檐步履百過幾曾倦閒無事翠餅烏丸教碾硬黃

繭紙摹徧遺余籀法真奇古屈曲珊瑚枝軟興不淺覓巧匠  
裝池付與屏六扇紅絲小硯把馬鄭紛綸周秦先後商略異  
同辨

又送陳雲銘入楚

數才名鷹揚河朔新來草檄能否萍蓬蹤跡何曾定只是北  
燕南楚王粲賦道四望山川信美非吾土晴川密樹問底事

隨人一帆夏口又指漢陽渡。金臺畔漸少銅駝俊侶馮誰  
共按簫譜尊鱸稻蟹鄉亭夢卜了歸期仍誤君此去料我亦  
無心更戀塵中組驪歌且住便解纜今朝登艫後日不遠直  
沽路

清平樂

濕雲籠霧曉色看成暮空裏雪花風約住十月薊門飛雨  
曆頭簡到殘年客懷轉覺淒然滿地已無黃葉一林惟有蒼  
煙

解佩令

送趙秋谷聯句

城頭畫鼓馬頭紅樹最無慘酒邊人去尋尊聽徧陽關也未  
抵者番別苦嘉善魏坤禹平一程風一程涼雨尋尊斷橋橫浦

淺沙深塢翠彎環好山無數海寧查慎行夏重卸了朝衫換獨

速莎衣醉舞坤勝東華滿鞞塵土尋尊

生查子 曉行鄧州

密樹引長堤重露微涓墜惟聽浦禽喧漸入行人隊  
隱隱望高城路出高城外初日未侵衣先閃寒鴉背

清平樂

齊河客舍

阿儂憊矣際曉還慵起今日郵籤翻百二猶是未晴天氣  
茅檐土銼人家酸風苦雨天涯回憶故園梅蕊不知多少飛  
花

金縷曲

過外祖唐刺史廢園感舊作

歷歷猶能記小門開苔峰檻外板橋花底潮落蟛蜞爬沙徧  
嫋嫋筠竿扶起自兵後曲池平矣倦柳衰荷都卷盡況鴛鴦  
翠鬣紅魚尾渾不辨釣游地 土酥隴麥看無際剩牆東午

風茶板冷雲蕭寺去是黃童來白叟感慨那禁對此但滿眼  
西州清淚斷陌踟躕歸騎晚斂殘霞樓角孤城閉誰會我恁  
時意

清平樂

鷓鴣塘生日

平安書到卜宅鷗塘早我亦安排歸計了沮溺耦耕也好  
今年初度長安明年定是鄉關漁弟樵兄對酒雞頭菱角堆  
盤

又

贈歌者陳郎

偷聲減字且洗衰翁耳惱亂多情人欲死只有臨川曲子  
陳郎巧囀歌喉尊前倍覺風流一霎塗妝縮髻十三四丫  
頭

又

題吳中女子呂文安畫



深閨暇日偶仿王郎筆小字親題無氣力殺粉調鉛第一  
圓珠斛得誰家香車遠隔天涯陌上依然柳色門前何處桃  
花

金縷曲

題查浦書屋圖

馬瞳村南渡趁輕帆雙峰寺外遠煙平楚橫漲橋邊鵝鴨鬧  
認得苔磯蔬圃有點點遙岑遮戶只恨牆東書屋少慣迎賓  
榻下莎廳住秋香滿小山樹年來穩向花甌步乍歸來雞  
栖豚柵幾曾添補笑指頭銜冰樣冷誰把草堂贊助看画裏  
皋禽翔舞曲院層臺終斷手算迴廊是我題詩處拚舊雨伴  
今雨

滿江紅

錢唐觀潮追和曹侍郎韻

曹侍郎錢唐觀潮一闋最爲崛奇今見雕本改竄可惜已康

熙丙子秋涉江追和其韻并附原詞于後不作三舍退避者  
欲存其真也

羅刹江空設險有海門雙闕日未午樟亭一望樹多於髮乍  
見雲濤銀屋湧俄驚地軸轟雷發算陰陽呼吸本天然分吳  
越遺廟古餘霜雪殘碑在無年月訝揚波重水後先奇絕  
齊向屬盧鋒下死英魂毅魄難消歇趁高秋白馬素車來同

弭節

枚乘七發弭節伍子之山

原作

曹溶

浪湧蓬萊高飛撼宋家宮闕誰盪激靈胥一怒惹冠衝髮  
點點征帆都卸了海門急鼓聲初發似萬羣風馬驟銀鞍  
爭超越江妃笑堆成雪鮫人舞圓如月正危樓湍轉晚  
來愁絕城上吳山遮不住亂濤穿到巖灘歇是英雄未死

報讎心秋時節

點絳脣

題虞夫人玉映樓詞集

玉映樓空鏡臺留得傷心句  
比肩人去誰忍修簫譜  
門柳風前依舊飄金縷  
廉纖雨返魂何處莫是秋千路

附原詞

海鹽

閨秀 虞北淑

蓉城

梅綻芳菲垂楊煙外低  
金縷韶華小住生怕廉纖雨  
戶淒涼蝴蝶雙飛去  
愁如許夢魂無據還在秋千路

曝書亭集卷第二十六